

四庫全書

經部

欽定四庫全書

周禮詳解卷三十二

宋 王昭禹 撰

布憲掌憲邦之刑禁正月之吉執旌節以宣布於四方而憲邦之刑禁以誥四方邦國及其都鄙達於四海凡邦之大事合衆庶則以刑禁號令

誥起吉反

令力正反

主道利宣不利周利明不利幽又况刑禁之設將使民易避而難犯苟匿為物而愚不識及犯又從而刑

之不幾於罔民者乎先王於大司寇正月之吉既使  
垂刑象之法以使有目者皆見又狗以木鐸使有耳  
者皆聞則人宜知所避矣然猶以為始和布刑止於  
邦國都鄙與萬民而已而未及於四方邦國也又設  
布憲之官使掌憲邦之刑禁而執旌節以宣布於四  
方此所以名官謂之布憲也布以數施之憲以表示  
之則四方雖遠又孰有不見聞而知者乎夫刑以懲  
惡禁以輔刑刑以制之所以致其義禁以止之所以  
致其仁故有刑必有禁亦期民之無犯而已先王懼  
四方之遠不能悉知則布憲執旌節以宣布於四方  
而憲邦之刑禁又烏可緩哉詩曰四國于蕃四方于  
宣蓋四國以六服之內言之也四方以六服之外言  
之也先有以扞蔽而定其內然後為之宣布其政教  
達之於外故言四方以別四國也周官正月之吉大  
司寇布刑於邦國都鄙則止於六服之內而已布憲  
憲邦之刑禁以詰四方邦國則及於六服之外也此

正與詩先言四國而後言四方同意以詰四方邦國及其都鄙非特邦國而已四方之遠則以威讓文詰為主故謂之詰也達於四海則四方之遠極於四海又見其遠之至也凡邦之大事合衆庶則以刑禁號令者謂邦有大事鄉合州黨族閭比之聯與其民人之什伍則以刑禁號令之也發之以為警戒之謂號令之以為法守之謂令揚子曰鼓舞萬物者其雷風乎鼓舞萬民者其號令乎雷不一風不再不一者號也

庶而號令亦欲其無犯也

禁殺戮掌司斬殺戮者凡傷人見血而不以告者攘獄

者遏訟者以告而誅之

攘七羊反

殺戮者上所誅惡也故掌戮之官掌之斬殺誅戮皆上之施刑於下也下以非法而相殺戮則在所禁

矣此禁殺戮之職所以設也掌司斬殺戮者謂非以法斬殺戮者司之以告而後誅之也於文反后為司后以執要而致簡則致詳而盡察者有司之事故司有察意凡傷人見血而不以告者血者陰之傷也有司宜告而不以告攘獄者過訟者事之大者宜至於獄事之小者宜至於訟者有司宜受而反攘却遏止之如此則姦凶得以侵善良勢力得以抑窮弱民之情將鬱而不伸下之惡將長而不革禁殺戮以告而誅之是所以佐善良扶窮弱也

禁暴氏掌禁庶民之亂暴力正者橋誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出入者則司牧之戮其犯禁者

正征同  
橋居表

反

以刑教中則民不誣者教官之事也以刑禁暴者刑  
官之事也教施於未然之前刑施於已然之後二者  
相為終始而已逆理而害治者謂之亂恃強而虐物  
者謂之暴力正見傳亂則敗類暴則害物力正則以  
橫逆而加人凡此皆下之難制者也述事為言答問  
曰語言語以信為主作言語而不信則誣偽以惑衆  
凡此皆下之難知者也政之不明也以下之難知政  
之不行也以以下之難制上之所誅於是為急故以告  
而誅之誅庶民如此則自上可知矣凡國聚衆庶則  
非合衆庶也若祭祀旬後之屬是已有犯禁者則戮  
之以正其罪且巡行而狗衆以示戒也奚謂女之繫  
於人者隸謂男之隸於人者於其出入則或司以察  
之或牧以治之亦以防其暴  
也故有犯命者則從而戮之

野廬氏掌達國道路至於四畿比國郊及野之道路宿  
息井樹若有賓客則令守涂地之人聚橐之有相翔者  
誅之凡道路之舟車擊互者叙而行之凡有節者及有  
爵者至則為之辟禁野之橫行徑踰者凡國之大事比  
修除道路者掌凡道禁邦之大師則令埽道路且以幾  
禁行作不時者不物者

橐音託  
擊音計

野道之小室謂之廬所以待行旅也故公劉之詩始  
曰于時廬旅終曰于豳斯館則館大而廬小也先王  
設官以比國郊及野之道路宿息之類故名官以野  
廬氏掌達國道路至於四畿則遂人所謂千夫有滄

澮上有道萬夫有川川上有路以達於畿是也謂之  
四畿則自王城五百里四面皆達之也遂人皆治野  
之道路而野廬氏必掌達其道路則凡以輔成遂人  
之事而已而司險又掌達其道路者蓋司險所達非  
特王畿之道路而已九州山林川澤之阻者也比  
國郊及野之道路宿息井樹者遺人所謂三十里有  
宿宿有路室所謂宿也十里有廬廬有飲食則所謂  
息也井所以共飲食樹所以為蕃蔽野廬氏則巡而  
比之也國語曰定王使單襄公聘於宋遂假道於陳  
以聘於楚道第不可行司里不受館國無寄寓而知  
陳之不能守其國則野廬氏達國之道路比及野之  
道路宿息者所以為先王之制也若有賓客則令守  
涂地之人聚橐之有相翔者誅之先王之時涂地皆  
有人以為之守有賓客則令其人聚而擊柝所以待  
暴客也相翔者語曰翔而後集彼翔而觀伺則有欲  
集而為寇盜之意故誅之所以禦姦也凡道路之舟



車輦互者謂舟行於水車行於陸或迫隘而相擊觸  
相差互則為之序先後而行之所以息爭止訟也凡  
有節者及有爵者至則為之辟有節者至則欲達之  
而無留難有爵者至則在所承而無敢慢故皆為之  
辟行人使避焉然則野廬氏其徒百有二十八則使  
其徒為之辟也禁野之橫行徑踰者橫行謂不由其  
道徑踰謂不由橋亦所以防穿窬之盜也凡國之大  
事比修除道路者國之大事則若大祭祀大賓客之  
類其事在國中者也治其壞謂之修去其穢謂之除  
有修除道路者而野廬氏則比較其人之數所以防  
怠也掌凡道禁則修閭氏所謂以兵革趨行者與馳  
騁於國中者是已然野廬氏所禁者在野之道也修  
閭氏所禁者在國之道也前言國之大事則在國中  
而已此言邦之大師則通國野焉令掃道路則所以  
致潔也幾禁行作不時者謂不夙則莫不物者謂衣  
服操持異常也幾微察之禁以止之皆所以防姦故

也

蜡氏掌除骹凡國之大祭祀令州里除不蠲禁刑者任人及凶服者以及郊野大師大賓客亦如之若有死於道路者則令埋而置楬焉書其日月焉縣其衣服任器於有地之官以待其人掌凡國之骹禁

蜡清預反骹似賜反令力呈反蠲古

玄反縣音懸

蜡氏掌除骹而與蜡同字者蓋蜡祭百物昔之羽羸鱗毛介物畢致焉則蜡祭所致者神也蜡氏掌凡骹禁則蜡氏所治者形也神寓於形則為生神離於形則為死物之生則形與神分為二以形為神之逆旅

則彼之形神雖分為二而昔嘗合而為一矣此治其形者所以與致其神者同謂之蜡也掌除鬲者人物之死其骨曰鬲月令曰掩骼埋鬲蓋精神者天之分也骨骸者地之分也精神與形各歸其根則骨骸在所掩埋而藏亦歸於地而已蜡氏掌鬲為是故也非特如此形合於神則為神奇而人之所親神離於形則為腐臭而人之所惡獨不見豚子之食於死母者乎少馬駒若皆棄之而走不見已焉爾不得類焉爾則蜡氏除鬲亦以人之所惡者在是故也凡國人之大祭祀令州里除不鬲禁刑者任人及凶服者以及郊野者蓋大祭祀先王所以致精神之至而交乎神明之隱不以哀樂欲惡貳其心又去物之可以昏憤其志意者焉不鬲刑者任人則在所惡也凶服則在所可哀也故蜡氏令州里除而禁之除不鬲所以致潔也任人謂司園任之以事之人也刑者謂黜劓之屬也凶服則子見齊哀者之類也郊特牲言祭之日

喪者不哭不敢凶服汎埽反道亦謂此也大師大賓客亦如之者亦令州里除不鬪禁刑者任人及凶服者以及郊野者蓋大師以危事行凶器則在所慎者客則致其齊欽如承神故也若有死於道路者則令置揭而埋書其日月焉縣其衣服任器於有地之官以待其人則欲令其識取之也掌凡國之飢禁則凡物之骨皆掌其禁而除之也

雍氏掌溝瀆澮池之禁凡害於國稼者春令為阱獲溝瀆之利於民者秋令塞阱杜獲禁山之為苑澤之沈者

澮澮古外反令力呈反阱在性反獲胡化反苑于院反

雍者和之至和至而過則壅塞而不通故雍又為壅塞之雍雍氏掌隄防以止水所以名官謂之雍氏也

水十里相犄則謂之溝水之大竇則謂之瀆水之所  
會謂之澮水決於此謂之池溝瀆池有禁然後其害  
去其利均亦所以息爭止訟也故雍氏掌其禁凡害  
於國稼者謂害國及稼也不言野而言稼蓋野之禁  
惟稼而已春令為阱獲溝澮之利於民者穿地為穴  
以陷禽獸謂之阱於阱中設木以載禽獸使足不及  
地謂之獲春令為阱獲以民方析而在田宜防其害  
也春令為溝瀆則以民方耕宜資其灌溉也所謂利  
民如此利則收成之時為其或陷害人也故令塞阱  
杜獲阱井也故塞之獲機也故杜之禁山之為苑澤  
之沈者苑圃也沈者醜也依山以為苑是使民得以  
專其利非善政也害之及於物者衆非仁政也此雍  
氏所以  
禁之

萍氏掌國之水禁幾酒謹酒禁川游者

萍音平

神農之書言萍能勝酒蓋萍之為物能勝酒又不沈  
溺故掌國之水禁禁酒謹酒禁川游者名官曰萍氏  
掌國之水禁者蓋水雖有潤澤灌溉之利而犯之則  
濡溺之則死民之迷愚至有決性命之情以爭尋常  
之利而不顧患者往往蹈而死焉先王豈忍坐視  
而恬不為之恤哉故水之險惡能害人之所與夫不  
時入水而捕魚鱉者一切禁之是乃所以為仁政之  
周也萍氏則掌其禁而已禁酒謹酒者芻豢為酒非  
以為禍也酒之流生禍焉故以禮飲酒者常始乎治  
而卒乎亂先王於為酒器每每致戒焉又沉飲酒用  
酒之際可不為之幾謹乎微而察之謂之幾制使勿  
縱謂之謹幾酒則於飲酒微察其不節也謹酒則於  
用酒謹制其無度也周書曰文王誥教小子有正有  
事無彝酒越庶國飲惟祀德將無醉所謂德將無醉  
以文王幾酒而庶國之飲酒者皆有節也所謂越庶  
國飲惟祀者以文王謹酒而庶國之用酒者皆有度

也又曰羣飲汝勿佚盡執拘以歸於周予其殺成王之於酒致嚴如此而晚周之君臣乃至於沉湎淫泆天下化之良可惜哉禁川游者亦所以防沉溺也

司寤氏掌夜時以星分夜以詔夜士夜禁禦晨行者禁宵行者夜遊者

寐而覺謂之寤使掌夜時使覺而不寐者安能定其漏刻之早晚哉所以名官謂之司寤氏也掌夜時者一日一夜凡有十二時夏則日長而夜極短冬則日短而夜極長春為陽中秋為陰中則晝夜分焉司寤氏司察夜事故所掌者夜時而已晝事無預焉以星分夜者星昴乎夜以日入而見以日出而沒以星分之則夜之或長或短或中而分皆可定而無差矣夜士則主行夜徽候者也夜禁則所以止夜之行遊者

也司寤氏於夜士夜禁則詔之使知也禦晨行者禁宵行者夜遊者自始至夜半曰宵宵者陰盛而陽衰之時也日出為旦晨則昧爽之前而日未旦之時傳云云御之而使去者禦也止使勿為者禁也則禁甚於禦以晨為近旦人將向明而作之時故但禦之而已以宣王之時去成王之世為未遠而君子之趨朝者或以夜未央或以夜未艾則司寤氏之職廢而不行為可知矣宜乎詩人因以箴之也

司烜氏掌以夫遂取明火於日以鑒取明水於月以共祭祀之明盥明燭共明水凡邦之大事共墳燭庭燎中春以木鐸修火禁於國中軍旅修火禁邦若屋誅則為

明竈焉

烜音毀夫方符反盥音贖墳扶云反燎力名反中音仲竈昌絹反



取明火於日而名官謂之司烜者易曰日以烜之盖  
火本於日亘之而後明然燿與烜皆火而司燿列於  
夏官司烜列於秋官者盖司燿掌出入火南方之屬  
也故列於夏官司烜共明火火司寇所奉也故列於  
秋官祭祀必取明水火者以物言之則得陰陽之潔  
氣也以道言之則潔而清明乃可以承祭祀也夫遂  
陽遂也鑿方諸也考工記所謂金錫半謂之鑿燧之  
齊是也言陽遂則知方諸之為陰言方諸則知陽遂  
之為圓陰陽者其氣也方圓者其體也火至陽之氣  
而陽為圓故取之必以陽遂水至陰之氣而陰為方  
故取之必以方諸以陽召陽以陰召陰各以其類也  
然陽遂又謂之夫遂者盖遂以金為之火金夫也金  
火婦也以金得火夫應婦而至也方諸又謂之鑿者  
盖鑿亦以金為之金水母也水金子也以金得水以  
母鑿子而子應也以共祭祀之明鑿明燭者明鑿以  
明水為鑿也明燭以明火為燭也共明水者共之以

為玄酒以滌染盛也凡邦之大事共墳燭庭燎者墳  
燭火燭也設於門外曰墳燭於門內曰庭燎中春以  
木鐸修火禁於國中則為季春將出火先事而戒也  
而軍旅修火禁者大衆所聚宜致懼故也屋誅謂舉  
家受誅也竈謂墮以埋其尸也明竈蓋揭其罪於竈  
上若明刑用梏馬司烜掌明竈則屋誅夜葬故也

條狼氏掌執鞭以趨辟王出入則八人夾道公則六人  
侯伯則四人子男則二人凡誓執鞭以趨於前且命之  
誓僕右曰殺誓馭曰車轅誓大夫曰敢不關鞭五百誓  
師曰三百誓邦之大史曰殺誓小史曰墨

條音滌趨七  
須反辟婢亦

反轅戶  
患反

條如條枚之條謂條理也狼豺狼之狼謂狼扈也先  
王立官掌條理道路之狼扈也以王與賓客之出入  
宜致肅焉故也鞭所以草人而便其事執鞭所以為  
威趨辟謂趨而辟也趨則走而致肅辟則所以使人  
避也條狼氏所以衛上者如此也條狼氏以下士六  
人為之而其徒有六人則帥其徒以趨辟與朝士帥  
其屬而以鞭呼趨且辟同意然朝士所主者朝之事  
在士而條狼氏所掌者在道路而已王出入八人夾  
道則以八人之為數右不合六戾右者也左不合九  
戾左者也於王趨辟者取其左右戾而有別故用八  
人焉自公而下則各降殺以兩故公六人侯伯四人  
子男二人尊卑之辨也凡誓執鞭以趨於前且命之  
者執鞭以趨辟所以衛上也於誓而執鞭趨於前所  
以制下也然誓之所掌如此特於軍旅之時故也方  
誓用於軍旅之時羣吏聽誓於陣前條狼氏執鞭以  
趨於前且命之者欲其聽誓故也必使條狼主誓以

掌辟之官以禁止為事故也誓右曰殺者為僕右誓其屬也誓馭曰車轅者為馭誓其屬也車之進止主於馭助車之進止者在於右則馭之為事尤重於右也故誓右曰殺誓馭曰車轅蓋以車轅裂之則其罪非止於殺故也誓大夫曰敢不關鞭五百刑不上大夫則亦為大夫誓其屬也關謂通之使聞敢不關則於軍旅之事無所聞也大夫雖不掌軍政於事當預聞而已其屬又豈有敢不聞者哉故誓之事曰敢不關誓之刑曰鞭五百孔子曰以吾從大夫之後又曰如有政雖不吾以吾其與聞之况軍旅於國事又為大者乎

脩閭氏掌比國中宿互櫟者與其國粥而比其追胥者而賞罰之禁徑踰者與以兵草趨行者與馳騁於國中

者邦有故則令守其閭互唯執節者不幾

此毗志反粥音育令力呈

反

里門謂之閭里有門所以通往來扞制內外先王立官以修治其事故名官曰修閭氏掌此國中宿互椽者宿謂守衛互謂行馬椽謂擊柝以待暴客修閭氏則校比之而已然所比者止於國中若郊野則弗預也與其國弼謂待而弼物於國中者市官所不治故脩閭氏比之而比其追胥者謂逐同盜賊者於比宿互椽亦因而比其數既比其人數則勤怠者可見勤則賞之怠則罰之故曰而賞罰之禁徑踰者謂行不由橋梁與野廬氏同意然修閭氏所禁者國中之行者野廬氏則禁於野而已不言禁橫行則國中與野異矣以兵革趨行與馳騁於國中者為其惑衆也故皆禁之邦有故則當防非常之變故令守其閭互所

令者閭里之民也。惟執節者不祭。以其有節以達之，則無所用糞也。

冥氏掌設弧張為阱，獲以攻猛獸，以靈鼓毆之。若得其

獸，則獻其皮、草、齒，須備。

冥音覓

先王仁民而愛物，然猛獸以其害人，則傷吾之仁政。故設官以攻之，而冥氏之所以立也。趨利而避害，獸之情與人同，欲攻取之，必有以使之。冥然而不覺，然後可獲。所以名官謂之冥氏，掌設弧張者，設弧以射之。設張以伺之，為阱獲以攻猛獸。以靈鼓毆之者，為阱獲以陷之，又鼓靈鼓使趨所陷也。靈鼓則鼓人，所謂鼓社祭者，是己以事言之，則靈鼓六面，擊之則使之驚而疾趨。以義言之，則社稷能祓除災害，用所鼓社祭者，則歸賴於神。若得其獸，則獻其皮、草、齒，須備。則非特有以為人除害，而又有以資其物之利用也。

庶氏掌除毒蠱以攻說禴之嘉草攻之凡毆蠱則令之

比之

庶章預反令力  
呈反蠱音古

先王以善政生養天下之民其興利也詳其除害也  
悉則生齒之數所以至於既繁且庶故設官以除毒  
蠱之害者謂之庶氏也掌除毒蠱者傳曰于文四蟲  
為蠱蓋蠱之毒能病害人故也以攻說禴之則用祝  
馬與大祝之六祈所謂攻說同意以嘉草攻之則用  
藥馬與瘍醫所謂以五毒攻之同意用祝則治於未  
然之前用藥則治於已然之後凡毆蠱則令之比之  
者蓋其徒有四人則令使為之校以比之皆其徒也

穴氏掌攻螫獸各以其物火之以時獻其珍異皮草

冥氏之攻獸有以攻其趨走而害人者至於藏伏而  
害人者未去非仁政之周故掌攻螫獸者名官謂之

穴氏螫獸則熊羆之屬也各以其物火之則其攻之也以其所嗜誘之以火煥而出之則凡在穴者皆不能自螫矣以時獻珍異皮草珍異以共膳羞之用皮草以共器物之用也

翼氏掌攻猛鳥各以其物為媒而拮之以時獻其羽翮

翼音翅  
居綺反

鳥羽謂之翼鳥所以飛者在翼攻猛鳥者以攻其翼然後可獲故名官謂之翼氏各以其物為媒而拮之者媒之以其類也拮之則係其足以禁其上出也以時獻其羽翮者攻猛鳥以除人物之害因以資其羽翮之利也孟子曰鳥獸之害人者消然後人得平土而居之則正以除害為主也然則獸人皮毛筋角入於五府以足王之燕私玩好之欲而異氏穴氏翼氏攻鳥獸之猛而其所獻皆不入五府者蓋異氏穴氏



特除其害而已。獸人則其所修之利，衆所除之害，悉所賴之。獲多仁施，及人於是，為大以其所施者大。然後可以兼百姓之奉矣。

柞氏掌攻草木及林麓。夏日至，令刊陽木而火之。冬日

至，令剝陰木而水之。若欲其化也，則春秋變其水火。凡攻木者，掌其政令。

柞側百反麓音鹿令平聲刊苦干反

除木曰柞。詩曰：載芟載柞，皆除木之謂也。盖先王欲其材木以為用，則立虞衡之官，柞而養蕃之。詩所謂帝省其山，柞域斯拔，松柏斯兌，是已欲其地作室以宅民。治田而稼，牆則刊剝而化之。詩所謂作之屏之，其當其翳，修之平之，其灌其樹，啓之辟之，其樅其楮，攘之剔之，其繫其柘，是已。然則柞氏之所掌，固先王

之所不廢也積木曰林山足曰麓草木所生林麓之地苟可以宅民稼穡者大司徒固嘗辨十有二土以相民宅矣辨十有二壤以知其種矣柝氏則因司徒之所辨者以攻治之而已故掌攻草木及林麓夏至令刊陽木而火之者夏至陽之日也陽木也以至陽之日刊而火之則不勝其陽而死且不肄矣冬日至令剝陰木而水之者冬至至陰之日也陰木也以至陰之日剝而水之則不勝其陰而死且不肄矣凡木之生於山南則為陽生於山北則為陰其陰陽之氣既偏勝矣又因至陽至陰之日而加以水火陰陽之盛氣宜其死而不復生矣若欲其化則春秋變其水火者欲其化而為土也陰木常以冬至之日水之矣至春又從而火之陽木常以夏至之日火之矣至秋又從而水之則其蘖薄於陰陽相殄之氣化而為土矣

薙氏掌殺草春始生而萌之夏日至而夷之秋繩而芟之冬日至而耜之若欲其化也則以水火變之掌凡殺

草之政令

薙讀如鬚繩以證反音孕芟所銜反

翦草曰薙其字從草從薙則以薙有分域萌芟有時也掌殺草者凡物以陽生以陰死惟草之為物其芟則陰不能死薙草者必有以殺之然後其芟不復生傳曰若農夫之務去草芟夷溫崇之然則春始生而萌之夏日至而夷之秋繩而芟之冬日至而耜之此殺之之術也春始生而萌之者蓋草有萌則春感陽氣而生方其生氣始達則不能夷之使不生故萌之而弗治焉夏日至而夷之則陽事畢而陰已生則生氣極矣於是乎可夷秋繩而芟之則夷而又生生而芟之也冬日至則陰事畢而陽已生則生氣復之時

於是乎耜之夷則刈其末而未及其芟芟則毀其芟而不止於末然其芟難死故耜之耜則用耒金而深殄之則不復生矣若欲其化則以水火變之者欲其化而為土則以火燒其新芟芟之本末又從而加之所以水則其感於陰陽相殄之氣而草化為土矣月令所謂燒薙行水凡殺草之術掌於薙氏故凡殺草之掌之政令皆

若族氏掌覆夫鳥之巢以方書十日之號十有二辰之號十有二月之號十有二歲之號二十有八星之號縣

其巢上則去之

若音剔覆芳復反縣音懸

人之情莫不欲吉而惡凶先王與民同吉凶之患者則凡兆凶者皆在所去焉故設官掌覆夫鳥之巢而

謂之蕝蒺氏蕝言摘也蒺言巢也摘其巢而去之則  
天鳥不復至矣以方書曰辰月歲星之神凡有氣形者制焉故書  
則去之蓋曰辰月歲星之神凡有氣形者制焉故書  
其號可以勝天十日之號則從甲至癸是也十二辰  
之號則從子至亥是也十二月之號則正月為娥十  
二月為荼是也十二歲之號則從寅曰攝提格至在  
丑曰赤奮若是也二十八星之號則從角至軫是也  
必以方書之者方木也以木為之其體方焉故謂之  
方木仁也方義也立人之道曰仁與義曰辰月歲星  
之神天道也必有盡人道然後可以致天道而勝天  
所以和同天人之  
際而無間者此也

翦氏掌除蠹物以攻禳攻之以莽草熏之凡庶蠹之事

蠹丁故反  
禳音詠

羽可前者曰翦翦所以除而去之故除三物者名官謂之翦氏蠹物虫之穿食器物者蠹之入物雖盛以素猶不免焉且橐而弗用是以有蠹故其字從橐從蟲以攻崇攻之以莽草熏之此除蠹之事也以攻崇攻之則猶六祈所謂崇攻也其攻則用祝焉以莽草熏之以莽草所以殺虫其熏之則用藥焉凡庶蟲之事則凡庶氏掌蠱毒之事翦氏與之通取聯事而攻之以蠱亦蠹之類也

赤友氏掌除墻屋以蜃炭攻之以灰洒毒之凡隙屋除

其貍蟲

友音拔蜃市軫反貍莫皆反

火大曰赤以戾右為守曰友凡隙屋除其貍蟲欲其宣布者見以戾陰隱為守故名官謂之赤友氏掌除墻屋則蟲豸藏逃其中陰以害物宜除而去之以蜃炭攻之則以火之毒氣暴之使出也以灰洒毒之

則以蜃灰洒而毒之使死也凡隙屋除其狸虫則隙屋之中狸虫亦有害人者故除之矣

蝮氏掌去毒黽焚牡鞠以灰洒之則死以其煙被之則

凡水蟲無聲

蝮音國去豈呂反毒戶蝮反黽莫幸反牡莫口反鞠弓六反被皮義反

蝮國虫也尊者所居惡其聒焉故置官以去之而謂之蝮氏新經云云毒音哇其鳴若哇也黽音猛其鳴猛也故蝮氏掌去之牡鞠鞠之不華者焚牡鞠以灰洒之則死則以牡菊之灰能制毒黽而殺之故也以其煙被之凡水虫無聲則牡菊之煙水能制水虫而勝之故也

壺涿氏掌除水蟲以炮土之鼓毆之以焚石投之若欲殺其神則以牡槀午貫象齒而沈之則其神死淵為陵

炮步交反禕  
音沽又音枯

壺瓦鼓也。涿擊之也。擊瓦鼓以毆水蟲，故名。官謂之壺。涿氏掌除水蟲，則以其能害人者。若南方水中狐蜮之屬，含沙射人，則死。凡此類皆害人者也。不可以不除焉。炮，土之鼓，則互鼓也。以炮土之鼓毆之，則以土能勝水而制之也。火石則以火燒石，以焚石投之，則使感陰陽相殄之氣而死也。若欲殺其神，謂水神龍罔象也。牡，禕謂榆木也。以牡禕為幹，從橫以象齒貫之，所謂午貫也。以牡禕午貫象齒而沉之，水神感其氣而死。其神既死，則淵水雖深實為陵矣。凡此之類，皆聖人所以變化驅除之術。非夫深窮物理之所，以相治相克者，孰能與於此。且夫琥珀拾芥，磁石引針，戎鹽累卵，懶膽分盃，壞漆以蟹，浣錦以魚，散血以藕皮，毀金以羊角，皆出於自然之理。先王命官如此，豈非知變化之道。知神之所為乎。則其寓於政事之



問莫非道之所運豈庸常之所能知哉

庭氏掌射國中之夫鳥若不見其鳥獸則以救日之弓與救月之矢夜射之若神也則以大陰之弓與枉矢射

之大音泰

庭者所以治也以潔清為尚先王立官以去夫鳥使國中潔清如庭故名官曰庭氏夫鳥謂呼鳴而為怪者若鵬與鷄其鳴有禍皆邪氣所生民常忌之先王因人情之所惡故在國中者皆庭氏射之若不見其鳥獸則若妖狐孽禽之類入夜而為妖非射之所能及則以救日之弓救月之矢夜射之救日之弓救月之矢謂救日月食所作者也常用此救日月則其精氣足以勝妖故以此射之若神也則以太陰之弓與

在矢射之神則若神降於莘叫於宋太廟之類非鳥獸之聲也太陰之弓救月者也以此射之則以日月之精氣勝其妖也於鳥獸言夜射則神以晝射可知之矣

銜枚氏掌司嚮國之大祭祀令禁無嚮軍旅田役令銜

枚禁嚮呼歎鳴於國中者行歌哭於國中之道者

嚮五羔反

叫 嚮音

枚以竹為銜於口所以止言語嚮謹也鄭氏謂枚狀如箸橫銜之為之繡結於項是也東山之詩言勿士行枚者蓋婦人之情望其夫無事於行陣銜枚故欲其無事於戰也掌司嚮者司察在朝者言語之諠譁也祭祀貴靜而肅大祭祀尤致嚴焉故令禁嚮孔子於宗廟朝廷便便言唯謹爾者亦所以戒嚮也軍旅

田役大衆之所聚惡譁而喜靜故令銜枚大祭祀止於令禁無踴者承祭祀者不若軍旅田役之衆也詩之楚茨言君婦莫莫以言承祭祀者靜而不譁也車攻之詩言之子于征有聞無聲者以言選車徒有善聞而無譁之聲也由此觀之則銜枚氏之所掌可知矣禁踴呼嘆鳴於國中者以其口而出聲者踴也氣分而戾陰者呼也過難而出氣者嘆也覩所異而嗟者鳴也若此之類為其惑衆故禁之歌樂聲也哭哀聲也人之樂不能不歌人之哀不能無哭聖人曷嘗抑人之情使無歌哭哉於所居而歌哭則可也行而歌哭於國中之道則為其感動人心故禁之也然踴呼嘆鳴言國中而歌哭言國中之道蓋國中則不必行而在道凡在國中皆禁足矣言國中之道則在國中歌哭有所不禁矣

伊耆氏掌國之大祭祀共其杖咸軍旅授有爵者杖共

# 王之齒杖

記曰伊耆氏始為蜡祭以息老物杖則老年者恃之  
以為安亦息老物之類也故掌共齒杖者名官以伊  
耆氏也大祭祀共其杖咸者咸盛杖之器也先王貴  
老八十則杖於朝大祭祀致敬以承神雖老者亦弗  
敢杖也故有司共咸以盛杖而藏之言國之大祭祀  
則非大祭祀老而杖於朝者弗與矣軍旅授有爵者  
杖所以致卒伍而且以為威也言有爵者則老而無  
爵者不任軍旅之事矣共王之齒杖者謂王賜老者  
之杖也記曰五十杖於家六十杖於鄉七十杖於國  
八十杖於朝所謂齒杖也王以齒杖賜老者而伊耆  
氏則共其用而已夫人之生也大塊載之以形勞之  
以生佚之以老自賦形以至於老天地之所以安之  
也天地安之以其形先王安之以其禮共於伊耆氏  
則佚老之意可見矣然則軍旅授有爵者杖貴貴也

共王之齒  
杖老老也

周禮詳解卷三十二

欽定四庫全書

周禮詳解卷三十三

宋 王昭禹 撰

大行人掌大賓之禮及大客之儀以親諸侯春朝諸侯而圖天下之事秋覲以比邦國之功夏宗以陳天下之謨冬遇以協諸侯之慮時會以發四方之禁殷同以施天下之政時聘以結諸侯之好殷類以除邦國之慝間問以諭諸侯之志歸賑以交

諸侯之福賀慶以贄諸侯之喜致禴以補諸侯之

裁

朝直遙反職內皆同此毗志反好呼報反頰通  
弔反慝吐得反間讀去聲脈上忍反禴古外

切

賓之字從宀從與從貝賓者主所宀也正趣隱以適  
已則利上趣明以與物則害也客之字從宀從各客  
雖主所宀也然不與之共休戚利害也司儀曰凡諸  
公相為賓則諸侯之君皆謂之賓也又曰諸公之臣  
相為國客則諸侯之臣皆謂之客也諸侯之君其勢  
則尊嫌于與王亢故欲其趣隱以適已則不疑于亢  
矣是以謂之賓也諸侯之臣其勢則卑嫌于屈而不  
能辨故欲其不與共休戚利害則能辨矣是以謂之  
客也凡賓客其禮或大或小或如常禮唯其時物也  
故或言大或言小或不言大小也此言賓則指要服

內諸侯言之也言大客則指邦國之孤卿言之也於  
大賓言禮於大客言儀者禮以本言儀以末言尊卑  
之序也子大叔見趙簡子問揖遜周旋之禮對曰是  
儀也非禮也此其辨歟春則東作之時也事作于春  
故以圖天下之事秋則西成之時也功成於秋故以  
比邦國之功夏則相見之時也謀陳於外則以相見  
為主故陳天下之謀于夏冬則合聚之時也慮協于  
內則以合聚為主故協諸侯之慮于冬諸侯有不順  
王命者將命以征伐之事名而會有時而然以其征  
伐討有罪也則有禁焉故曰以發四方之禁于巡守  
之歲或不巡守會而見之以攷制度衆國所同以其攷  
制度則有政焉故曰以施天下之政時聘以恩問之而  
已故曰以結諸侯之好殷頰以事有所察治故曰以  
除邦國之愆問問存省之屬也以言問之則上下之  
志無所不達故曰以諭諸侯之志賑以交神之福也  
以服歸之則與諸侯共其福也故曰以交諸侯之福



諸侯有喜也慶賀以贊之所以與之同其樂諸侯有  
裁也致禮以補之所以與之同其憂朝覲宗遇會同  
六者諸侯致勤于王者也時聘殷見問歸賑賀慶  
致禮六者王致愛于諸侯者也諸侯禮致其勤王以  
仁致其愛尊卑之意通內外之誠達尚何猜嫌疑貳  
之為患哉所以親諸侯者在是矣然或言諸侯或言  
天下或言四方者新經云云且天下之事于冬則窮  
矣于春則在所通之于冬則弊矣于春則在所新之  
先王將欲圖之亦未始敢忽必協慮于冬思患以預  
防之然後于春則圖之諸侯之慮既協而無間此圖  
之所以成也圖以謀事謀成則謨成矣謨成則功成  
矣今此先事後功以成事故也先謨後慮終則有成  
始故也自夏宗而下皆言以而獨春朝不言  
以者蓋春朝為朝禮之正非適為圖事也

以九儀辨諸侯之命等諸臣之爵以同邦國之禮而待

其賓客上公之禮執桓圭九寸纁藉九寸冕服九章建  
常九旒樊纓九就貳車九乘介九人禮九牢其朝位賓  
主之間九十步立當車軹擯者五人廟中將幣三享王  
禮再裸而酢饗禮九獻食禮九舉出入五積三問三勞  
諸侯之禮執信圭七寸纁藉七寸冕服七章建常七旒  
樊纓七就貳車七乘介七人禮七牢朝位賓主之間七  
十步立當前疾擯者四人廟中將幣三享王禮壹裸而  
酢饗禮七獻食禮七舉出入四積再問再勞諸伯執躬

圭其他皆如諸侯之禮諸子執穀璧五寸繅藉五寸冕服五章建常五旒樊纓五就貳車五乘介五人禮五宇朝位賓主之間五十步立當車衡擯者三人廟中將幣三享王禮壹裸不酢饗禮五獻食禮五舉出入三積壹問壹勞諸男執蒲璧其他皆如諸子之禮凡大國之孤執皮帛以繼小國之君出入三積不問壹勞朝位當車前不交擯廟中無相以酒禮之其他皆眡小國之君凡諸侯之卿其禮各下其君二等以下及其大夫士皆如

之

纒音藻藉在夜反旂音留樊畔干反乘去聲軹之氏反攬必刃反裸古亂反酢才洛反食音嗣積子賜反

勞老報反  
相息亮反

傳曰名位不同禮亦異數蓋人非禮不立禮非儀不行禮寓於刑名度數之間於儀則為體儀見于周旋動容之際于禮則為用先王以其用而合其體故以九儀辨諸侯之命等諸臣之爵以同邦國之禮而待其賓客公侯伯子男之君其命者五孤卿大夫士之臣其爵者四以儀而辨其命等其爵故曰九儀諸侯之命諸侯之爵不同也而謂之同邦國之禮者比之謂以不同同之也出于上下聽而守之者命也資于尊所入小而人所奉者爵也有命然後有爵則命尊于爵矣故諸侯則言命于諸臣則言爵與大宗伯言王命諸侯則儻小宗伯則言玉賜卿大夫爵則儻同意也三公八命出封加一等則謂之上公上公九命故

其禮以九為節侯伯七命故其禮以七為節子男五命故其禮以五為節公侯伯子男所建皆龍旗而謂之建常以象其道故也上公立當車軹先儒謂轂末車軹北向在西邊也侯伯立當前疾先儒謂駟馬車軹前若軹人所謂軹深四尺七寸軹前曲木是也衡謂在軹下車軹兩服之領前是也新經云云以相禮曰介以相賓曰擯介擯所以傳辭也禾米芻薪曰積所以給賓客之用也或多或寡亦隆殺之辨也先王之待諸侯可謂厚矣未至則有委積既至則有問勞有食禮以致其恭有牲牢以備其禮之盛有瓚裸以用其誠之至諸侯顧王所以待已者如此又安得不相與一德以尊君親上哉是故諸侯以天子所以待已者如是之在故不敢不盡其誠以將其意不敢不備其物以奉其德廟中將幣三享為是故也且高不足以有臨則不能使之入賓明不足以有察則不能使之內向王者以至高至明之德則諸侯享之唯恐

其禮之不至儀之不繇此所以同于三享也夫道以三數酒以三行為至則享至於三豈用其至乎蓋天子之待諸侯諸侯之奉天子則尊卑未始有異心焉書曰享多儀儀不及物惟曰不享則享至于三者儀之及物可知也享必于廟中者益恭敬者幣之未將君子不可以貨取而廟中則示其恭敬之至也大國之孤朝位當車前不交擯廟中無相則彌感而畧矣以酒禮之則不裸焉以裸如祭祀非禮人君則弗用也

邦畿方千里其外方五百里謂之侯服歲壹見其貢祀物又其外方五百里謂之甸服二歲壹見其貢嬪物又其外方五百里謂之男服三歲壹見其貢器物又其外

方五百里謂之采服四歲壹見其貢服物又其外方五百里謂之衛服五歲壹見其貢材物又其外方五百里謂之要服六歲壹見其貢貨物九州之外謂之蕃國世

壹見各以其所貴寶為摯

見賢遍反嬪婢人反蕃音繁摯音至

自侯服歲一見至于要服六歲一見以遠近為之疏數之節也自要服以上所貢有常物而蕃國則各以其所貴寶為摯者詳于治內而畧于治外也郊特牲曰旅幣無方所以別土地之宜而節遠邇之期也土地之宜在物而遠邇之期在人然則六服之法其見有六歲之差其貢有六物之異六物之異所謂別土地之宜也六歲之差所謂節遠邇之期也然則書之周官言王撫萬邦巡侯甸四征弗庭綏厥兆民則曰

六服羣辟莫不承德至于訓迪厥官則曰六年五服一朝蓋六年五服一朝者以侯甸男邦采衛言也六服羣辟罔不承德者兼要服而言之也先王之制中國五服而周官言六者蓋近中國之夷狄承德則國家間暇可以明政刑之時也方是時也四征弗庭其治未若制禮之際為已備矣故其限朝止于五服而已周官行人于六服之見則及于要服者則其治為尤詳于四征弗庭之時也近中國之夷狄非特承德而又能入貢以來見焉則制禮以致太平者此其極也然周制每歲則一服入見故更六年而五服各一朝也此行人所以言衛服五歲一見而書之周官所以言五服一朝之意焉

王之所以撫邦國諸侯者歲徧存三歲徧頰五歲徧省七歲屬象胥諭言語協辭命九歲屬瞽史諭書名聽聲



音十有一歲達瑞節同度量成牢禮同數器修法則十

有二歲王巡守殷國

屬章束反  
守去聲

安而使之謂之撫先王于諸侯畫九畿以處之列九等以差之雖致其恩未嘗不制之以義雖擾以教未嘗不乂之以政自歲徧存而至于十有二歲之巡狩殷國威德兩存剛柔相濟寬而有制猛而不暴此其所以安之使撫也王之所以撫邦國之諸侯如斯而已又安有負固不服若菟柳之不朝者哉又安有犯令陵政若飛隼之不制者哉存頰省鄭氏以為王使臣于諸侯之禮所謂問問是也存者同而問之也頰者問而視之也省者巡而察之也頰則詳于存也省則詳于頰也記言天子巡狩山川神祇有不舉者為不敬不敬者君削以地宗廟有不順者為不孝不孝者君黜以爵變禮易樂者為不從不從者君流革

制度衣服者為畔畔者君討有功德者加地進律夫天子之巡狩其省方也如此則人所謂存之類之省之者雖曰以恩問之而亦微察其如此也五方之民言語不通諭言語所以使之通也賓主不交辭亦不相接欲民之無相褻也協辭命所以使之交也古之名官以象胥以明所以懷而服之者遠也諭書名所以同其文也聽聲音所以和其聲也瑞六瑞也節六節也達瑞節所以達四方而交之也度以度物也量以容物也同度量所以同四方而一之也有以交之也于是成牢禮若掌客之所掌是也有一之也于是一同數器若合方氏之所掌是也法八法也則八則也能達四方而交之同四方而一之然後下之所守同乎王之所制損益因革以時修之大順以之成大利以之致而王之所以撫邦國者于是為至巡狩殷國之禮可以行矣此王巡狩殷國之禮所以在于修法則之後歟王巡狩則諸侯各朝于方岳王不巡狩

則會諸侯而殷見或巡狩或殷見其出而省焉一也  
書于舜典言五載一巡狩周官行人則十有一歲王  
巡狩者蓋天下之法在舜之時則畧在周之時則詳  
以其法之畧則巡之也宜數以其法之詳則巡之也  
宜疏然觀周官大小行人環人之數絡繹于道路則  
王出不必頻而周知天下之故遠方殊俗莫不承德  
也此帝王之  
世所以異歟

凡諸侯之王事辨其位正其等協其禮賓而見之若有  
大喪則詔相諸侯之禮若有四方之大事則受其幣聽  
其辭凡諸侯之邦交歲相問也殷相聘也世相朝也

詔相

之相  
去聲

傳曰諸侯有所謂王事者其朝覲會同之事歟辨其位則有九十七十五十步之異正其等則有尊卑上下之差協其禮則有牲牢享燕積膳之具也若有四方之大事謂兵寇之類來告急者也禮不虛拘必有幣以將其恭必有辭以達其意行人於幣則受之于辭則聽之所以告王也凡諸侯之邦交謂鄰國之往來也小以事大大以比小粲然之文驩然之恩足以相愛接而四鄰睦四鄰睦然後可以蕃王室矣聘義曰天子制諸侯比年一小聘三年一大聘歲相問則比年之小聘也殷相聘則三年之大聘也大聘施于小聘之中歲故曰殷殷中也左傳曰孟僖子如齊殷聘禮也父死子立曰世世相朝則君親相見焉若相問相聘則遣臣而已凡此皆邦交之禮也若春秋之時邦交之法不修侵伐滅入無國無之則行人掌邦交之禮曷可廢哉

小行人掌邦國賓客之禮籍以待四方之使者令諸侯  
春入貢秋獻功王親受之各以其國之籍禮之

使色吏  
反令力

呈反

行人之官以其職之大也故掌大賓之禮及大客之  
儀以其職之小也故掌賓客之禮籍而已夫名位不  
同禮亦異數禮籍則其禮之書也禮之數皆具于此  
矣四方之使者謂諸侯遣臣于王國也小行人以其  
職之小故待四方之使者也春朝正之時于時為造  
始令入貢則貢者下以職供而上得以興事造業也  
秋歲成之時于時為成終令獻功則功者事之成也  
諸侯入貢獻功而王必親受之則以諸侯為尊故也  
各以其國之籍禮之則國有大小  
其禮有等差而皆載之于籍也

凡諸侯入王則逆勞於畿及郊勞胝館將幣為承而擯  
凡四方之使者大客則擯小客則受其幣而聽其辭去勞

聲

諸侯之入王以其在道塗之勞則必有以勞之以致  
其愛也其勞之也不可以一而足故有逆勞郊勞之  
禮逆勞于畿始至而勞之于外也郊勞既至于館而  
勞之于內也胝館謂致館而且胝其便宜也郊勞則  
賓已至館故及郊勞則胝館胝館亦所以致愛也將  
幣為承而擯謂廟中將幣以行享禮宗伯為上擯而  
小行人為承而擯之所以致敬也大客則擯擯之而  
見王使得自言也小客則受其幣而聽其辭則為聽  
其辭而入告于王也  
此亦尊卑之序然也

使適四方協九儀賓客之禮朝覲宗遇會同君之禮也  
存頰省聘問臣之禮也達天下之六節山國用虎節土  
國用人節澤國用龍節皆以金為之道路用旌節門闕  
用符節都鄙用管節皆以竹為之

朝覲宗遇會同諸侯以禮致其敬于王皆國君之事  
故曰君之禮也存頰省聘問王以禮致其愛于諸侯  
王使臣之事故曰臣之禮也掌節言凡邦國之使節  
則使邦國者所執王官所掌之節也小行人所達謂  
之天下之節則所謂龍節人節虎節管節邦國都鄙  
使者所執非王官所掌邦節也都鄙用管節而掌節  
不言都鄙之管節則使都鄙者无節矣以旌節行之  
而已虎節人節龍節皆以金為之金不可變為義故

也旌節符節管節非為尊者特命則唯上所制期无失節而已故以竹為之竹有自然之節故也新經云云

成六瑞王用璚圭公用桓圭侯用信圭伯用躬圭子用

穀璧男用蒲璧

璚吐電反  
信音申

以質言之則謂之玉以形言之則謂之器以合驗言之則謂之瑞玉所以比德器所以藏禮瑞所以應實上有以合驗乎下下有以合驗乎上則瑞成矣行人所謂成六瑞者如此大宗伯作六瑞則制其度數也故自王以下皆言執行人成六瑞則奉其成事也故自王以下皆言用執之所以行禮用之所以合符行禮者事之大合符者事之小故于宗伯言執而于行人言用此其辨也



合六幣圭以馬璋以皮璧以帛琮以錦琥以繡璜以黼

此六物者以和諸侯之好故

琮才宗反琥音虎  
璜音黃好呼報反

六幣皆諸侯所用以享也蓋君子雖不可以貨取然亦不可以虛拘有物而无誠則禮有所不行謂之貨取可也有誠而无物則情有所不伸謂之虛拘可也故諸侯之致享內盡其誠心外備其禮物而行人所以合六幣也兩謂之合圭以馬璋以皮璧以帛之屬皆兩相合也新經云云合琮以錦而不以皮則皮者天為之文也錦者人為之文也天為文則本于自然人為文則出于或使自然之文非所以合琮故也琥為虎形象陰之效法故合琥以繡以五采備謂之繡故也半璧為璜北方之所用也故合璜以黼以白與黑謂之黼故也二王後享用圭璋侯伯用璧琮子男用琥璜凡此六幣皆諸侯以享王為主以其有以通

其情而來則謂之好以其有以因其事而來則謂之  
故行人為之合六幣焉所以和其好故而使之不乖  
而已故曰以和  
諸侯之好故

若國札喪則令賻補之若國凶荒則令調委之若國師

役則令槁禴之若國有福事則令慶賀之若國有禍災

則令哀弔之凡此五物者治其事故

槁苦報反  
禴音會

先王之於諸侯分土而與之守則尺地莫非吾土也  
分民而與之治則一民莫非吾民也使之守吾土則  
必有與之同保其土使之治吾民則必有與之同安  
其民則治雖有遠近勢雖有內外而利害休戚實若  
一家也安可若是愬乎此賻補調委槁禴慶賀哀弔  
之禮所以掌于行人之官凡以治其事故而已病疾

為札札而死曰喪札喪則在所賻補以利傳之謂之賻助其不足謂之補也穀不熟為凶凶甚而為荒凶荒則在所賻委以利周之謂之賻以聚與之謂之委也大宗伯所謂以喪禮哀死亡以荒禮哀凶札是也

有兵寇則謂之師會衆以興功則謂之役師役則在所槁檜具勞而橐則謂之槁檜衆財以與之則謂之檜也大宗伯所謂以檜禮哀圍敗以恤禮哀寇亂是也福事則鬼神之所佑而人道所喜者也福事則在所慶賀以心承禮而往則謂之慶加以物焉則謂之賀也大宗伯所謂以慶賀之禮親異姓之國是也達神而為禍天所降曰災則在所哀弔哀則發于聲音弔則如弔喪而用其至大宗伯所謂以弔禮哀禍災是也凡此五物者先王用之以治邦國之事與其故也所作謂之事所逢謂之故札喪凶荒禍災則出于所逢者也師役福事則或出于所作焉札喪凶荒天事也師役人事也福事所樂也禍哉所憂也先天事

而後人事先所樂而後所憂此其序也

及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此五物者每國辨異之以反命於王以周知天下之

故樂音

洛

前以五物治其事故主諸侯而言之故皆稱國自利害為一書而下主萬民而言之故先稱萬民然後五物事故亦反命于王以周知天下之事故于萬民之利害稱及焉夫聖人以天下為度而休戚與之同以

百姓為心而憂樂與之共則天下之故其可不以周知之乎然四方之遠事物之變無窮而王之耳目所不及聽採所難明非行人之官巡行而辨異之有所不能徧究而悉舉故為之書以述其事而五物皆異書也然則著古昔之昏婚禘千里之覺覺載之當年足以明政事施之來世足以貽後觀是其所以為書豈小補哉于萬民知其利害然後為之與其利而去其害如是則大利可致也于禮俗政事教治刑禁知其逆順然後為之禁其逆以達其順如是則大順可成也有以成大順則悖逆暴亂作慝猶犯令者可嚴而制之以義矣有以致大利則禮喪凶荒厄貧可寬而恤之以仁矣夫如是則康樂和親安平可坐而致也蓋聖人以一身觀天下則一身必欲其康樂也以下一家視天下則一家必欲其和親也以下一國視天下則一國必欲其安平也民康而後可樂則康樂者出于民之性也民和而後可親則和親者出于民之情

也民安而後事平則安平者出于民之分也然民不能自康樂也所以與之為康樂者實君使之遂其性而民不能自和親也所以與之為和親者實君使之通其情而民不能自安平也所以與之為安平者實君使之明其分而已此康樂和親安平所以序于五物之後也然先王以天下為一家中國為一人則小行人以此五物者巡狩天下每國辨異之名為一書以反命于王以周知天下之故則先王所以同四海于一堂之上者可謂知所要矣

司儀掌九儀之賓客擯相之禮以詔儀容辭令揖讓之節將合諸侯則令為壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其

禮公於上等侯伯於中等子男於下等其將幣亦如之

其禮亦如之王燕則諸侯毛

相息亮反  
鄉去聲

公侯伯子男之為賓孤卿大夫士之為客夫行人則辨其命等其爵而待之以禮司儀則掌其擯相之禮而已出接賓曰擯入贊禮曰相儀者禮之用容者形之變以言達意謂之辭守以參合乎上謂之令以手拱人謂之揖先人後己謂之讓儀容所以相接辭令所以相與揖遜所以相欽儀容辭令揖讓各有節司儀則以言詔之而已詔非特告也古者合諸侯則必為壇于國外以命事焉有事于壇者皆所以致其亶故壇之字從亶亶之為言致實以坦故亶之字從亶從旦亶實也旦坦也所以交神宜致實以坦故也壇必三成為三等焉以禮出道其數成于三故也所謂公于上等侯伯于中等子男于下等是也宮旁一門

則覲禮所謂天子為宮方三百步四門壇十有二尋深四尺是也掌舍言為壇墻宮棘門則其門以棘為之也詔王儀南向見諸侯此則合諸侯之時鄉明以聽天下者王也朝位王南面則其合諸侯而見之豈異此歟庶姓諸侯非王之親也故謂之庶姓異姓同姓則王之親也鄭氏謂土揖下手揖之時揖平手揖之天揖舉手揖之蓋異姓親于庶姓同姓親于異姓故其揖之儀有隆殺也如此及其擯之謂擯諸侯以前王也公于上等侯伯于中等子男于下等則以爵之尊卑而為之等殺如此也其將幣亦如之謂其將幣以享也其禮亦如之謂其禮之有裸也或于上等或于中等或于下等亦如此而已王燕則諸侯毛所以示慈惠而親之也貴老而尚齒故其儀如此齒則均也而以老為尚此之謂王燕則諸侯毛

凡諸公相為賓主國五積三問皆三辭拜受皆旅擯再



勞三辭三揖登拜受拜送主君郊勞交擯三辭車逆拜辱三揖三辭拜受車送三還再拜致館亦如之致殮如致積之禮及將幣交擯三辭車逆拜辱賓車進答拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再拜賓三還三辭告辟致饗餼還圭饗食致贈郊送皆如將幣之儀賓之拜禮拜饗拜餼拜饗食賓繼主君皆如主國之禮諸侯諸伯諸子諸男之相為賓也各

以其禮相待也如諸公之儀

積音恣勞去聲殮素尊反授註作受賓亦如之賓註

作賓辟音  
避食音嗣

凡諸侯之邦交世必使之相朝諸公相為賓謂相朝也于所停止則有積所以待賓之用也以其間濶則有問所以致恭于賓也以其道塗之勞則有勞所以致愛于賓也三辭其以禮來于外若不敢當焉也積問皆三辭拜受再勞亦三辭拜受尊而敬之也積問受之于庭故不言登勞則受之于堂故曰三揖登拜受旅擯者公則擯九人旅則陳之而已以主國方遣臣來無所事于交擯也勞禮重于問禮故非特拜受而已于其使臣之旅也又從而拜送之也然以遣臣再勞為未足主君又從而郊勞焉則致愛之勤于是為至矣交擯謂各陳擯九人而使傳辭也車送拜辱謂賓以主君躬勞出舍門而逆之謝其屈辱而來三

揖所以致恭三辭所以致謙然後拜而受之也至主君之去賓又出車以送之主君三還辭之然後賓乃再拜送之也致館亦如之者賓始至主國使大夫授館主君又以禮親致亦所以示其愛之勤也其致館也亦主君郊勞之禮也致殮如致積之禮者夕食曰殮非若饗館之為大也故如致積之禮三辭拜受旅賓而已將幣請賓享主君也及將幣則賓始入廟主君迎賓故交擯以傳辭也車逆拜辱主君以車送賓屈辱其來賓車于是進而答拜主君也三揖三讓主君揖而賓讓也每門止一相則為將致敬于廟也及廟唯上相入則致敬故也擯相賓介相主合而言之皆曰相也賓三揖三讓將登堂揖而讓主君也既登堂以幣享主君主君則再拜受幣不曰受而曰授者以主君于賓授幣則拜而受之也主君拜授幣尊其所享賓拜送幣致敬于所享也每事如初也賓亦如之鄭讀作儻言以鬱邑禮賓也上于下曰禮敵者曰

饋禮器曰諸侯相朝灌用鬱鬯無籩豆之薦謂此朝禮畢饋賓也及出車送三請三進謂主君請賓就車也主君每一請車一進欲遠送之也三還三辭主君一請賓亦一還一辭三還三辭則告以避去也故終之以告辟凡言三讓三辭三辟者有所不敢進則讓有所不敢受則辭有所不敢當則辟也熟食謂之饗可食之物生氣存焉謂之饋還圭謂賓享主君用圭以將意畢則還其圭于賓也饗以飲為主致贈謂賓去而贈以財也如送謂主君躬送賓至于郊也此六者唯饗食連賓其餘皆主君親往焉其逆送揖讓辭受之節皆如將幣之儀也賓之拜禮者謂賓所當拜之禮也饗饋饗食皆禮之重者故拜焉拜謂就朝而拜謝之所以尊其禮也賓繼主君皆如主國之禮者謂賓復主人之禮費也夫一國之財為有限而贈勞饗食之禮為甚厚以有限之財而供甚厚之費苟無以繼之則財匱物竭而將何以為禮哉故古者諸侯

之交各稱其邦而為之幣以其幣而為之禮而賓之  
享獻者亦如主國之禮而無過與不及焉所適之國  
雖其費而不病其乏用者殆以此也侯伯子男凡相  
為賓其進退揖讓之儀則同于諸公至其饗餼饗食之  
禮則各賦其命數而為之隆殺矣故  
曰各以其禮相待也如諸侯之禮

諸公之臣相為國客則三積皆三辭拜受及大夫郊勞  
旅擯三辭拜辱三讓登聽命下拜登受賓使者如初之  
儀及退拜送致館如初之儀及將幣旅擯三辭拜逆客  
辟三揖每門止一相及廟唯君相入三讓客登拜客三  
辟授幣下出每事如初之儀及禮私面私獻皆再拜稽

首君答拜出及中門之外問君客再拜對君拜客辟而對君問大夫客對君勞客客再拜稽首君答拜客趨辟致饗餼如勞之禮饗食還主如將幣之儀君館客客辟介受命遂送客從拜辱於朝明日客拜禮賜遂行如入之積凡侯伯子男之臣以其國之爵相為客而相禮其儀亦如之凡四方之賓客禮儀辭命餼牢賜獻以二等從其爵而上下之凡賓客送逆同禮凡諸侯之交各稱其邦而為之幣以其幣為之禮凡行人之儀不朝不夕

不正其主面亦不背客

賓使者之賓註作賓辟音避稽上聲勞去聲朝直遙反上時掌

反稱尺  
證反

相朝者諸侯之禮也相聘者諸臣之禮也諸公之臣相為國客則施于相聘之時也諸公五積其臣下其君之禮二等故三積拜受則拜而受之于庭也諸公先再勞而後主君郊勞諸公之臣則使大夫郊勞而已主君郊勞交擯三辭公車逆拜辱故臣則拜辱而不以車三讓登聽命謂客登堂而聽主君之命也下拜登受謂聽命既畢於是下堂而拜然後登堂而受主君之命賓使者亦如初之儀鄭氏讀為擯謂勞用束帛擯用束錦也致館如初之儀謂使大夫致館其儀亦與郊勞同也及將幣旅擯三辭亦異乎諸公之交擯也拜逆客辟謂主君拜逆客辟而不答拜也客辟而不答拜非特以其不敢當焉以主君拜逆之意不

止于客也每門止一相為將致敬于朝及廟唯君相  
入則客相不入焉以君尊而客卑故也三讓客登拜  
謂主君讓客登堂而主君拜客至也三辟授幣謂  
三辟主君之拜然後以君命授幣于主君也授幣既  
畢則下堂而出也每事如初之儀謂享及有言也亦  
與諸公拜送幣之後言每事如初同也及禮私面私  
獻皆再拜稽首君答拜者謂主君以醴禮客而客則  
私面而有私獻也私面者猶所謂私覲也左傳楚公  
子棄疾見鄭伯以其乘馬八匹私面則私面固有私  
獻矣然或言私面或言私覲于卿大夫則有私面私  
覲有束錦乘馬而私面亦如之也昔晉韓宣子私覲於  
子產以玉與馬則私覲有獻亦可知矣別而言之則  
覲與面不同通而言之則一而已然使之私覲則禮  
也朝覲而行私覲則非禮也故禮記言朝覲大夫之  
私覲非禮也再拜稽首所以致敬于所尊也君答拜  
則不稽首矣以主君而客臣故也出及中門之外即



大門之內也。然後問君。問大夫。勞客者以在廟授幣。方致敬焉。未可遽問而勞之也。問君客再拜而對。鄭氏謂問君曰君不恙乎。對曰使臣之來寡君命臣于庭。問大夫客對鄭氏謂問大夫曰二三子不恙乎。對曰寡君命使臣於庭。二三子皆在君勞客。鄭氏謂勞客曰道路悠遠客甚勞。問君則再拜對。問大夫則對而不拜者尊卑之辨也。勞客而客則再拜稽首以尊勞。卑宜致敬而用其至也。致敬而拜其至也。致饗餼如勞之禮。饗食還圭如將幣之儀。者饗食還圭其禮重于饗餼。故也。君館客。客將去。主君就省之也。客辟介受命。謂客不敢當主君之尊。故辟焉。而介則前而受命也。遂送者以客將行。主君遂拜送之也。客從而拜辱于朝者以屈辱主君之就館。故拜而謝之也。明日客拜禮。賜謂拜乘禽。君之加惠故也。如入之積則始終皆三積也。凡侯伯子男之臣以其國之爵相為客而相禮其儀亦如之。謂卿大夫士各以其爵之尊卑。

而為禮之隆殺以至辭受拜揖之儀亦然也凡四方之賓客禮儀辭命籛牢賜獻以二等從其爵而上下之者禮儀所以相接辭命所以相與籛牢所以致敬賜則主君之好賜獻則禽獸之屬皆自上及下降殺以兩而為之豐殺如是則無過也無不及也一稱其爵而已凡賓客送逆同禮者來則逆之而有問勞之儀去則送之而有贈送之禮非勤于始而怠于終非樂于暫而厭于久卒如一而已此四方之賓客所以粲然有文以相接權然有恩以相親睦乃四鄰以蕃王室者以此道素行故也凡諸侯之交各稱其邦而為之幣者稱其邦之大小而為幣之隆殺也以其幣而為之禮因其幣之隆殺而為禮之厚薄也如是則賓之所以繼主君者無過與不及而主君所以禮賓者亦無過不及矣夫邦國之君臣相為賓客先王設官為之掌其禮問勞贈送物為之數拜揖辭受事為之節此邦國之君臣所以相親也觀春秋之時一言之

不饑一拜之不中而兩國為之暴骨則周官圖民禍  
患豈為不豫哉凡行人之儀不朝不夕不正其主面  
亦不背容者不朝謂之正東鄉也不夕謂之正西鄉  
也不正其主面亦不背容者謂常視賓主之前却得  
兩鄉之而已

周禮詳解卷三十三

欽定四庫全書

周禮詳解卷三十四

宋 王昭禹 撰

行夫掌邦國傳遽之小事媿惡而無禮者凡其使也必以旌節雖道有難而不時必達居於其國則掌行人之

勞辱事焉使則介之

傳張戀反遽其庶反使色吏反難乃旦反馬故書作夷鄭司農讀夷

使為句

大行人掌邦國賓客往來之大禮小行人掌其禮籍以待四方之使者是職雖分小大而皆以行為主故

名官謂之大小行人若行夫則行人之屬官而掌國使之小禮雖所掌者小而非智足以帥人者亦不足以充其任故名官謂之行夫掌邦國傳遽之小事媿惡而無禮者傳鄭氏謂乘傳騎驛而使者蓋事雖小而欲急達故也媿惡謂吉凶之事蓋事小而禮籍有所不載故也若夫載于行籍之大事則有大小行人存焉非行夫所掌矣凡其使也必以旌節則道用旌節以表之雖道有難而不時必達則雖以他故後時而王命不可廢也居于其國則非以王命出行之時也掌行人之勞辱事則凡大小行人有煩勞汗辱之事皆行人掌之也夷使則介之者謂行人若使于四夷行夫則為之介也

環人掌送逆邦國之通賓客以路節達諸四方舍則授

館令聚橐有任器則令環之凡門闕無幾送逆及疆

居疆

良反

夏官有環人秋官復有環人者蓋夏官環人掌環四方之故取周巡往來若環之無端也秋官環人掌環賓客之任器取周圍保護若環之無隙也官雖同而所主之意則異也掌送逆邦國之通賓客謂邦國賓客取道往來者而環人則逆送之通與易所謂往來不窮謂之通同意以路節達諸四方謂無節者有幾則不達故以路節達諸四方則掌節所謂道路用旌節是也舍則受館者國野之道五十里有候館賓客至則環人受之也令聚橐者謂野廬氏若有賓客則令守涂地之人聚橐則環人乃令野廬氏也有任器則環之者謂賓客有任用之器環人則令其屬合守涂地之人環衛之也凡門闕無幾者謂賓客出入環人以路節達之故門闕無幾也送逆及疆者疆謂王畿四方之界也賓客始來而逆之終去而送之皆至王畿

之界  
所也

象胥掌蠻夷閩貉戎狄之國使掌傳王之言而諭說焉以和親之若以時入賓則協其禮與其辭言傳之凡其出入送逆之禮節幣帛辭令而賓相之凡國之大喪詔相國客之禮儀而正其位凡軍旅會同受國客幣而賓禮之凡作事王之大事諸侯次事卿次事大夫次事上

士下事庶子

闕亡中反使所吏反  
賓相之賓註作儼

象胥掌四夷之言者也東方曰寄南方曰象西方曰狄  
韞北方曰譯寄言託韞言知譯言易此獨以象言者舉

一以互見也必言象以周之化自北而南以言其所  
致者遠也先王立官以道夷狄之言凡以相之而已  
故名官以象胥先王以治治中國以不治治夷狄故  
于中國疆以周索有教以導其志有政以齊其行於夷  
狄疆以戎索則立官以寄象鞮譯而已此詳畧之辨  
也夫天下有道守在四夷殊方異俗莫不同風承德  
梯航而來則蠻夷閩貉戎狄之國使歸欵輸誠歲無  
虛月象胥之譯其言又曷可少哉故掌傳王之言而  
論說焉論則使之俞其言說則以言明其理彼聞吾  
王之言將心悅而誠服如五音之和于耳又安有乖  
而不和者如嬰兒之親父母又安有疏而不親者哉  
然在職方氏言四夷八蠻七閩九貉五戎六狄皆有  
圖地掌于職方而可辨數要者也象胥言掌蠻夷閩  
貉戎狄之國使不言其國數則象胥所掌非特職方  
可辨數要之國也故不言其數焉若以時入賓則協  
其禮與其辭言傳之者入賓則行人所謂世一見者



是也不謂之入王而謂之入賓則或非王政所加焉故也協其禮則四海之諸侯其爵不過子而已以禮待之協之則有同而無異矣然則協其禮豈特見于饗饋饗食之間哉蓼蕭之澤及四海有所謂既見君子儻革沖沖和鸞雖雖萬福攸同則天子又有乘馬路車以致其好而成之以禮也與其辭言傳之則接之以辭言象胥則協其辭言傳而通之也王制曰達其志通其欲與此所謂協其辭言傳之同意也凡其出入送逆之則送往而逆來也禮節幣帛辭令而相相之者禮節所以相接幣帛所以致享辭令所以相與象胥則掌擯而相之也凡軍旅會同受國客幣而擯禮之者謂軍旅以征伐時會以發禁殷同以施政四海之諸侯或遣臣以聘問則象胥擯而禮之也凡作事謂作四夷之事也王之大事諸侯者國之大事在祀與戎則作大事于四夷者謂有戎事于四夷也諸侯以敵王所愾為事故大事在諸侯然則彤弓錫

有功諸侯則饗夷衰而諸夏盛故六月之序曰彤弓  
廢則諸夏衰矣次事則非戎事謂威讓之令文誥之  
辭或施於四夷者則量其事之輕重或以卿或以大  
夫或以上士也若夫下事則事之尤小者故以庶子  
而已言下事庶  
子則包中士矣

掌客掌四方賓客之牢禮餼獻飲食之等數與其政治  
王合諸侯而饗禮則具十有二牢庶具百物備諸侯長  
十有再獻王巡守殷國則國君膳以牲犢令百官百牲  
皆具從者三公眡上公之禮卿眡侯伯之禮大夫眡子  
男之禮士眡諸侯之卿禮庶子壹眡其大夫之禮

長上  
聲守

去聲從  
才用反

傳曰名位不同禮亦異數四方賓客之牢禮餼獻飲  
食之等數以其名位而差之也政以正之治以理之  
掌客國新殺禮凶荒殺禮札喪殺禮禍哉殺禮在外殺  
禮則有政治矣王合諸侯則五等之國君威在則其  
禮必有以優異之故享禮用十有二牢以王禮之數  
而庶具百物焉諸侯長謂上公九命作伯者也禮用  
十有再獻則非特具十有二牢而已于獻又所以致  
天子之厚意矣王或巡狩殷國君膳以牲犢則貴  
誠而不貴味也故郊特牲亦曰天子巡狩諸侯膳以  
牲犢命百官百牲皆具則備物也言王合諸侯而饗  
禮遂言天子巡狩殷國而國君膳以牲犢禮務施報  
也蓋天子施禮于諸侯備十有二牢以多為貴也諸  
侯報禮于天子膳以牲犢以少為貴也以多為貴者

外心也以少為貴者內心也禮器曰古之聖人內之為尊外之為樂少之為貴多之為美諸侯之于天子觀天下之物無可以稱其德者得不以少為貴乎郊特牲曰牲芻芻食祭帝芻芻用諸侯之膳天子上同乎帝尊貴之也天子之于諸侯為之牢禮之數而諸侯之待王官也令百牲皆具樂美之也蓋謂待王以多則為褻待百官以少則為簡故禮器曰先王之制禮也不可多也不可寡也唯其稱也王之三公八命出封則加一命而為上公故從者三公賦上公之禮王之卿六命出封則加一命而為侯伯故卿賦侯伯之禮王之大夫四命出封則加一命而為子男故大夫賦子男之禮士賦諸侯之卿則王之上士也庶子壹賦其大夫之禮庶子包中士下士而言之也蓋百官雖令百牲皆具而亦不可無隆殺之等故從其爵命之數而有

所賦焉

凡諸侯之禮上公五積皆眡殮牽三問皆脩羣介行人宰史皆有牢殮五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如殮之陳牽四牢米百有二十筥醢醢百有二十甕車皆陳車米眡生牢牢十車車乘有五斂車禾眡死牢牢十車車三秬芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之凡介行人宰史皆有殮饗餼以其爵等為之牢禮之陳數唯上

介有禽獻夫人致禮八壺八豆八籩膳大牢致饗大牢  
食大牢卿皆見以羔膳大牢侯伯四積皆眡飧牽再問  
皆脩飧四牢食三十有二簋八豆三十有二鉶二十有  
八壺三十有二鼎簋十有二腥二十有七皆陳饗餼七  
牢其死牢如飧之陳牽三牢米百筥醢醢百甕皆陳米  
三十車禾四十車芻薪倍禾皆陳乘禽日七十雙殷膳大  
牢三饗食再食再燕凡介行人宰史皆有飧饗餼以其爵  
等為之禮唯上介有禽獻夫人致禮八壺八豆八籩膳

大牢致饗大牢卿皆見以羔膳特牛子男三積皆眡殮  
牽一問以脩殮三牢食二十有四簋六豆二十有四釧  
十有八壺二十有四鼎簋十有二牲十有八皆陳饗餼  
五牢其死牢如殮之陳牽二牢米八十筥醯醢八十甕  
皆陳米二十車禾三十車芻薪倍禾皆陳乘禽日五十  
雙壹饗壹食壹燕凡介行人宰史皆有殮饗餼以其爵  
等為之禮唯上介有禽獻夫人致禮六壺六豆六籩膳  
眡致饗親見卿皆膳特牛

積音恣釧音刑牲註作脰管  
姜呂反甕烏弄反斲素口反

耗丁故反乘去聲大音  
泰食音嗣見賢遍反

先王之待諸侯何其至也未至也致積始至也致殮  
及其朝享之後又致饗籩之大禮饗食之盛禮有牢  
有獻有膳有燕銅鼎簠壺之類醢醢禾米之屬禮備  
其物物備其數然食之弗愛是以豕交之也則有問  
勞送逆之示其勤愛之而弗敬是以獸畜之也則有  
辭受揖遜之示其恭然恭而無實君子不可以虛拘  
又况其愛之乎拜揖辭受恭之文也禮而裸之則又  
盡其恭之之實也問勞送逆愛之文也後夫人致禮  
則又盡其愛之之實也先王所以致愛與恭如其  
至而諸侯又安得不一德一心以親其上哉大者以  
仁比小小者以智事大相朝之君相聘之使旌節繼  
道講信修睦未嘗或絕者實有以致之也上公五積  
侯伯四積子男三積皆眠殮牽者賓始至則有夕食  
之殮其致殮也羊則牽而致焉上公殮五牢侯伯殮



四牢子男殮三牢皆賦殮牽者各賦其數而已上公三問皆脩侯伯再問皆脩子男一問皆脩于其始至以問間澗有脩焉脩者脯之加薑桂者也羣介行人宰史皆公所以從行者也尊其君以及其臣故于其方致問之始亦有牢也鄭氏謂臣有牢而君用脩疑其非禮恐有脫誤蓋上公致積則有殮牽問禮隨而至故加以脩而已由此觀之則羣介行人宰史之有牢不為過也至于侯伯子男則不言者以上公其爵命為隆其禮為獨優故也上公食四十侯伯食三十有二子男食二十有四食謂庶羞美而可食者也其設蓋陳于楹外東西共四列也上公其列之數則十侯伯列之數則八子男列之數則六也上公簋十侯伯八子男六簋所以庶稻梁者也公堂上六東西夾各二侯伯堂上四東西夾各二子男堂上二東西夾各二上公豆四十壺四十侯伯豆三十有二壺三十有二子男豆二十有四壺二十有四蓋豆公堂上十

六東西夾各十二侯伯堂上十二東西夾各十子男堂  
上十二東西夾各六禮器言天子之豆二十有六諸公  
十有六諸侯十有二以聘禮差之則堂上之數與此同  
也壺所以盛酒者也其設于堂夾亦如豆之數也上公  
銅四十有二侯伯銅二十有八子男銅十有八銅羹器  
也則公堂上二十有二東西夾各十侯伯堂上十有二  
東西夾各八子男堂上十東西夾各四也上公鼎簋十  
有二侯伯與子男亦皆十有二者鼎牲器也簋黍稷之  
器也牲天產以養精黍稷地產以養形二者相資以為  
養皆食之至也故合鼎與簋而言之皆常食也未始有  
加損焉故其數皆止于十二鼎正鼎九陪鼎三皆設于  
西階前也簋堂上八東西夾各二也上公牲三十有六  
侯伯腥二十有七子男牲十有八牲即牲之腥者或  
言牲或言腥互見也三牲具為牢而每牢皆九為列  
上公牲四牢則凡三十六也侯伯腥三牢則凡二十  
七也子男牲二牢則凡十有八也皆陳于阼階前也

饗饋上公九牢侯伯七牢子男五牢饗食熟焉其氣和之至也饋可食之物生氣存焉此乃朝享之後所致之大禮也其死牢如殮之陳則上公五牢侯伯四子男三皆陳於門西也牽生牢也上公四侯伯三子男二皆陳于門西如積也上公米百有二十管侯伯百管子男八十管十斗曰斛十六斗曰簋十簋曰秉四秉曰筥皆橫陳于中庭也上公醢醢百有二十壘侯伯百壘子男八十壘車皆陳以車盛壘而陳之也醢陳于碑東醢陳于碑西也既陳則不復用車矣故侯伯子男言皆陳而不言車也車米厖生牢牢十車車秉有五穀車禾厖死牢牢十車車三秬芻薪倍禾皆陳車米載米于車也米四牢四牢分為四列然則牢十車則車米凡四十車也十六斗曰簋十簋曰秉每秉有五穀則二十四斛也車禾載禾于車也禾稟實并刈者也車禾厖死牢牢十車車三秬夫死牢如殮之數上公殮五牢牢十車則車禾凡五十車也四秉

曰筭十筭曰稷十稷曰秬每車三秬則三十稷也芻薪倍禾則凡百車也皆陳謂陳于門外也米在門東禾在門西芻薪雖取數于禾而薪從米芻從禾也侯伯米三十車禾四十車芻薪倍禾則降於公也子男米二十車禾三十車芻薪倍禾則降於侯伯也上公乘禽日九十雙侯伯七十雙子男五十雙者乘禽謂乘行羣處之禽雉雁之屬是也殷膳大牢殷中也謂于中又以大牢膳賓示儉文而不忘賓也侯伯言膳大牢子男不言則蒙上文可知也然獨于上公言以及歸則侯伯子男亦以及歸可知也上公三饗三食三燕諸侯再饗再食再燕子男壹饗壹食壹燕饗以酒為主食以食為主燕以恩為主唯以恩為主故異于饗食之禮示以慈惠以毛為尚其樂無算也取其歡而已其禮無算也取其醉而已取脯以降黍稷而去則王所以致愛于諸侯于是為至矣其數或三或再或壹亦隆殺之節也若弗酌則以幣致之者謂君

或有故不親饗食燕也且饗有酬幣食有侑幣不饗則以酬幣致之不食則以侑幣致之所以將意而致敬者不可失故也凡介行人宰史皆有殮饗饋以其爵等為之牢禮之陳數唯上介有禽獻凡此皆邦國之諸臣從諸侯之賓者也尊其君以及臣臣故有殮饗饋之禮焉然其禮之隆殺各以其爵等之上下而為之也上介則以其於諸侯之臣為尊宜有以優異之故獨有禽獻而其餘則無有也上公大夫致禮以八壺八豆八籩膳大牢致饗大牢食大牢夫人致禮所以助王養賓亦夫婦相成之義也壺陳于東序籩豆陳于戶東凡夫人致禮于諸侯皆使下大夫致之也夫人致禮侯伯與上公同不言食大牢則殺于上公也夫人致禮于子男六壺六豆六籩膳祗致饗則又殺于侯伯也然此特言膳祗致饗者言夫人致膳于小國君以致饗之禮則是不復饗也上公卿皆見以羔膳大牢侯伯卿皆見以羔膳特牛子男親見卿

皆膳特牛卿皆見者見于賓也以羔則以其擊見焉  
子男獨言親見者言卿於小國之君有不造館見者  
必親見乃致膳矣不言羔則蒙上文可知也既見之  
又膳之者亦所以助王養賓也或用大牢或用特牛  
亦禮之殺也先王之于祭祀致愛致敬其于承賓也  
亦如之方其祭祀也王耕以供粢盛后蠶以為祭服  
王裸而后亞裸王獻而后亞獻而終之以諸臣之所  
昨也及其承賓也亦王裸獻而后亞之王致酒后夫  
人致飲終之以卿皆見而膳之也夫唯以所承神者  
而承賓則致愛致敬可謂至矣諸侯賦王所施如此  
又孰不思所以  
厚報之也哉

凡諸侯之卿大夫士為國客則如其介之禮以待之凡  
禮賓客國新殺禮凶荒殺禮札喪殺禮禍哉殺禮在野

在外殺禮凡賓客死致禮以喪用賓客有喪唯芻稍之

受遭主國之喪不受饗食受牲禮

牲稍所教反  
牲音腥

前言凡介有殮饗餼以其爵等為之牢禮之陳數謂其從君而來也今此言卿大夫士為國客則以聘問而來也若以聘問來而自為客則王所以待之亦如其為介之禮也先王待賓客其禮為有常制而其用則因時而制宜以財之所入為有限而其用則不可以無節也故國新凶荒札喪禍哉在野在外皆殺禮焉國新謂新建國也凶荒謂無年也禍哉謂兵寇水火之變也國之所費既多則宜節用焉故禮不得不殺然制其正不制其殺則禮之本寧儉故也

掌訝掌邦國之等籍以待賓客若將有國賓客至則戒

官修委積與士逆賓於疆為前驅而入及宿則令聚橈  
及委則致積至於國賓入館次於舍門外待事於客及  
將幣為前驅至於朝詔其位入復及退亦如之凡賓客  
之治令訝訝治之凡從者出則使人道之及歸送亦如  
之凡賓客諸侯有卿訝卿有大夫訝大夫有士訝士皆  
有訝凡訝者賓客至而往詔相其事而掌其治令

復扶  
又反

從才用反  
相去聲

秋官有訝士又有掌訝者蓋訝士以訝四方獄訟為主  
掌訝以訝賓客為主唯以訝獄訟為主故謂之訝



士士刑官也唯以訝賓客為主故謂之掌訝所掌者訝而已掌邦國之等籍以待賓客等籍謂九儀差數之籍也所以訝賓客者必以其籍之差數而為隆殺之節焉異於小行人掌邦國賓客之禮籍也若將有國賓客至則戒官修委積謂戒牛人羊人倉人委人之屬蓋牛人共積牛羊人共積羊倉人共道路之穀積委人共委積之芻薪掌訝戒之使各早正素備以給賓客之用也與士逆賓于疆為前驅而入謂與訝士也以訝士邦有賓客則與行人送逆之入于國則為之前驅而辟故也及宿則令聚橐謂令野廬氏也以野廬氏若有賓客則令守涂地之人聚橐也及委則致積以王命致之于賓也至于國賓入館次于舍門外待事于客謂賓有所求索則為通之也及將幣為前驅則道之以至于朝也至于朝詔其位入復則掌訝入復于王也及退亦如之亦復于王若孔子所謂賓不顧矣是也凡賓客之治令訝訝治之治謂理

其事也。賓客之理其事則以告。訝掌訝為如朝而理之也。凡從者出則使人道之謂。凡賓客從行之人或出則掌訝使其屬道之也。及歸送亦如之。賓至逆之於疆則其歸也亦送之至于疆也。凡賓客諸侯有卿訝。卿有大夫訝。大夫有士訝。士皆有訝。謂賓客之爵命有尊卑。王所使訝賓客之人亦不同也。諸侯之為賓以其有君道焉。故皆訝之以卿。以王之卿則六命其出封則為侯。伯王之禮於上。公王之禮於諸侯。則卿皆見而致膳焉。使卿而訝諸侯固其宜也。若卿而訝之以大夫大夫而訝之以士亦其宜矣。士皆有訝謂公侯伯一命之士也。亦以士訝之而已。故曰皆有訝焉。凡訝者賓客至而往詔相其事而掌其治令詔以言告之。相以力贊之。賓客方至則掌訝往而詔相其事也。治謂理其事令謂有所使。賓客有治令而掌訝則為之掌也。

掌交掌以節與幣巡邦國之諸侯及其萬民之所聚者道

王之德意志慮使咸知王之好惡辟行之

好呼報反惡鳥路反辟音

避

天地不交而萬物不生上下不交而功勳不成先王設官掌邦國之通事而結其交好此其名官所以謂之掌交與掌以節與幣者節謂道路用旌節以表之也幣謂掌邦國之通事而結其交故也巡邦國之諸侯及其萬民之所聚者先王規方千里以為甸服其餘以分公侯伯子男使各有守然邦國之諸侯衆矣非若左右之近邦國之萬民衆矣非若畿甸之近也然則苟非播告之修不匿厥指彼將何從而為之儀唱乎君者臣之唱也彼將聽唱而應矣上者下之儀也彼將視儀而動矣道王之德意志慮所以為之儀

唱王之得于己者德也王之心有所感發者意也王之心有所之者志也王所思患而豫防之者慮也德之所存意之所發志之所之慮之所定好惡之實存于其間矣掌交道王之德意志慮使之咸知王之所好而行之咸知王之所惡而辟之蓋王之所好非作好也無非遵王之道而已王之所惡非作惡也無非遵王之路而已遵王之道以為好則所好者皆上下之所同人孰不歡然而行之乎遵王之路以為惡則所惡者皆遠近之所同人孰不協然而避之乎其行之也若趨利而不自己其避之也若畏法而不敢犯天下人豈有私好惡哉先王之時道德一風俗同天下如一家中國如一人者掌交與有力矣然而掌交之道王志則與擇人誦王志異蓋道則道其實誦則誦其言道其實以交邦國萬民者刑也故屬之秋官誦其言以正邦國萬民者政也故屬之夏官

使和諸侯之好達萬民之說掌邦國之通事而結其交

好

先王於諸侯裂地以封之疏爵以貴之欲其為王國之屏也則好之可謂至矣先王于萬民受田里以安之頒職事以任之欲其為王心之體也則說之可謂至矣王好諸侯則諸侯果何好哉莫不惟王之好也王說萬民則萬民果何說哉莫不唯王之說也莫不好王而其好或乖者無以和之而已莫不說王也而其說或壅而不宣者無以達之而已如是則猜疑忌之隙往往緣之而起諸侯萬民雖欲致其臣子之情有不可得也唯有以和其好則諸侯所以好王之情協而不乖矣惟有以達其說則萬民所以說王之心宣而不壅矣尚何遠近內外之間乎然所以至是者以掌交巡邦國之諸侯及其萬民之所聚者道王

之德意志慮使咸知王之好惡辟行之乃能然也掌  
邦國之通事而結其交好者夫三等之邦國星分碁  
布于九州之內其勢疑若睽間而相絕然先王制為  
朝覲聘問之禮行于其間則有往來不窮之通矣掌  
交又以幣將其意而結其交好則又推而行之以致  
其通矣謂之通事如斯而已往來不窮者天之道也  
推而行之者人之道也先王立掌  
交之職亦所以和同天人之際矣

以諭九稅之利九禮之親九牧之維九禁之難九戎之

威

先王之于諸侯分土而與之守分民而與之治患其  
擅一國之名寵則或至于倚勢以自驕專制節之大  
權則或至于怙侈以滅義將欲防微杜漸折衝消萌  
使之懷德而不敢搆畏威而不敢侮則王者威福之柄

其可不謹乎然則掌交諭之以九稅之利九禮之親  
九牧之維是盡其所以福之之道也諭之以九禁之  
難九戎之威是盡其所以威之之道也九稅九職之  
稅也方其裂地以封之固已使之得征其民而莫不  
知有之以為利也今又諭之以九稅之利使知任土  
焉九禮九儀之禮也方其列爵以等之固已使之各  
守其爵而莫不知守之以為分也今又諭以九禮之  
親使知分守焉九牧九州之牧也太宰于施典之際  
固已建其牧而莫不知小大以相維也今又諭以九  
牧之維使知聽令焉九禁九法之禁也九戎九伐之  
戎也大司馬以九伐之法固已正之而莫不知奉法  
而畏威也今又諭以九禁之難使知辟禁諭以九戎  
之威使知免兵焉彼又安有弛慢悠悠以違王命者  
哉然則宗周之時六服承德庶邦丕享比小事大以  
蕃王室者掌交  
之諭豈小補哉

掌察

闕

掌貨賄

闕

朝大夫掌都家之國治日朝以聽國事故以告其君長  
國有政令則令其朝大夫凡都家之治於國者必因其  
朝大夫然後聽之唯大事弗因凡都家之治有不及者

則誅其朝大夫在軍旅則誅其有司

長丁  
文反

掌都家之國治其官以上士二人下士四人為之而  
名官謂之朝大夫者以其日朝以聽國事故以告其  
君長有以智帥人之義故謂之朝大夫也掌都家之  
國治者謂公卿王子弟之都大夫之家凡有治于國



則朝大夫掌之也所作謂之事所遭謂之故朝大夫  
日朝以聽其事故以達之于都家之君長君謂其國  
君也長謂其卿大夫也凡有所正者皆政也凡有所  
使者皆令也國有政令則令朝大夫以告都家之吏  
也凡都家之治于國也必因其朝大夫然後聽之以  
朝大夫掌都家之國治故凡事之小者有治于國皆  
因朝大夫以達于國然後聽之也若事之大者則非  
因于朝大夫必都家之君長自達于國也都家之治  
有不及以朝大夫弗達之故則罪在所誅也在軍旅  
則朝大夫弗預焉都家司馬弗達之過也故誅其有  
司有司謂都司馬家司馬也先王置朝大夫之君使  
都家之治因之以達于國使國之事故因之以告於  
都家則下之事無不上聞上之政無不下達則自國  
中以至于數百里之遠不啻若左右之近若耳目之  
前又安有壅遏蔽塞之患哉彼有堂上之遠于百  
里堂下遠于千里戶外遠于萬里者蓋失于此矣

都則

闕

都士

闕

家士

闕

周禮詳解卷三十四

欽定四庫全書

周禮詳解卷三十五

宋 王昭禹 撰

冬官考工記

一而不可不易者道匿而不可不為者事道一而能  
易則雖不主故常而未始外乎事事匿而有為則雖  
麗乎形數而未始離乎道道未始外事此幽者之所  
以闡也事未始離乎道此顯者之所以微也莊子曰  
既已謂之一矣且得無言乎一與言為二二與一為  
三自此以往巧歷不能計而况其凡乎此自無以適  
有由道以之事者也又曰事兼於義義兼於德德兼  
於道此自有以適無由事以入道者也是以聖人體

道之常無以應天下之有體道之至虛以應天下之實而未始廢于事也故六官之設始于天官以掌治而治以道為本終于冬官以掌事而事以智為主蓋道出而生智智則貞固足以幹事也冬于方為北于物為罔北宅乎幽罔未有形陰于此乎終陽于此乎始芸芸之物自此而復乎道擾擾之緒自此而之乎事道之與事曷嘗相離哉聖人散道之妙以寓于事即事之粗以達于道故備物致用雖皆法度之陳迹而立象明意莫非性命之真理由此觀之則考工之所記持技巧之事而已哉然其名官謂之司空則以其空土以居民故也書曰司空掌邦土居四民時地利居四民時地利者事職之體用也而記者止謂之考工則事官正以典事為務故也先王名官以司空則以居四民言之也作記者以考工言之則以時地利言之也夫百工之事雖本于聖作智創而非巧述工守則不足以設施而致用此百工所以與於六職

之一也然工之事有精粗有能否餼廩欲稱事則工不可以不考也賞誅欲當事則工不可以不考也作記者謂之考工凡以質其成效而已然典禮殊缺學者雖不親聖人之全經而先儒追述之功亦不為無補矣

國有六職百工與居一焉或坐而論道或作而行之或審曲面執以飭五材以辨民器或通四方之珍異以資之或飭力以長地財或治絲麻以成之坐而論道謂之王公作而行之謂之士大夫審曲面執以飭五材以辨民器謂之百工通四方之珍異以資之謂之商旅飭力

以長地財謂之農夫治絲麻以成之謂之婦功

與音預  
執同勢

長丁  
丈反

夫天職氣覆地職形載聖職教化物職所宜則凡麗乎陰陽之域者未嘗無職也有所受而聽之者謂之職天地雖大而受職乎道聖人雖尊而受職乎天臣民則卑而受職乎君一失其職則傷之者至然則自王公以至於士大夫工商農婦之屬又安可以無職乎勞心者治人勞力者治于人王公士大夫勞心以治人者也百工商旅農婦勞力以治于人者也自王公以至農夫謂之六職而百工居其中故曰國有六職而百工與居一焉事道者逸事事者勞無為而導者逸有為而卑者勞王公尊而事道故坐而論之逸而無為者也士大夫卑而事事故作而行之勞而有為者也故曰坐而論道謂之王公作而行之謂之士

大夫夫致治之序本在上末在下王公務本以經治故坐而論道以謀其始士大夫務末以贊治故作而行之以成其終坐則無為而未始有作論則言之而未始有行然則士大夫特推王公所論之道作而行之以見其事業而已夫一人之身而百工之所為備五材者民器資之以有成者也一材不可闕而一器不可廢則以飭五材以辨民器百工之事也又烏可後乎哉然欲辨民器必先飭五材欲飭五材必先乎審曲面執惟窺理所在然後能審曲惟正體所向然後能面執五材天之所生必致力以修飭之然後可以為民器則若飭木而為舟車弓廬之屬飭金而為鼎量劍削之屬飭土而為甌甗簋豆之屬飭水而為運用之以成乎衆材之屬飭材以為器而民器各有宜焉不可以不辨其為輪也辨其高下之地其為弓也辨其安危之人其為庇也辨其地之堅柔其為劍也辨其士之上下故曰審曲面執以飭五材以辨民



器謂之百工物貴為珍物殊為異所貴所異者彼此不通其所有則無以相資以為用商旅所以遷有資無而物賴之以通焉故曰通四方之珍異以資之謂之商旅百穀雖有種而不能自生雖有生而不能自長所以生而長之實賴三農之為故為之耕耨為之播種去其蟲賊燹其荼蓼實穎實粟既堅既好者三農生長之力也故曰飭力以長地財謂之農夫夫人無羽毛以耐寒暑所以禦寒暑者必藉乎衣服先王稽其女功使作二事治絲而成之以為帛治麻而成之以為布卒歲必有衣褐當暑則袵絺絺凡皆婦功之所成也故曰治絲麻以成之謂之婦功六職之序王公制法以示百工者也士大夫行法以治百工者也商旅通物以資百工者也農夫長財以養百工者也嬪婦化治以成百工者也故王公士大夫之序在百工之上商旅農夫婦功之事在百工之下焉荀卿曰精于道者兼物物精于物者以物物王公士大夫精

於道者也。工商農夫精於物者也。工雖具人器而精於物，然而百工之事皆聖人之所作，以象寓意以器藏禮，則百工信度以承道者也。其亦有異于商旅農夫之屬焉。記考工者以百工承王公士大夫之後，而處商旅農夫之前，不為無深意矣。

粵無罇，燕無函，秦無廬，胡無弓車。粵之無罇也，非無罇也。夫人而能為罇也。燕之無函也，非無函也。夫人而能為函也。秦之無廬也，非無廬也。夫人而能為廬也。胡之無弓車也，非無弓車也。夫人而能為弓車也。

粵音越罇音博燕音

廬函而南反廬魯吳反夫音扶

傳曰少成若天性習貫如自然粵之無鑄工燕之無  
孟工秦之無廬工胡之無弓車之工皆以其地之人  
少習而成之故不置是工也蓋有所短而後見所長  
有所拙而後見所巧粵人之巧皆長於為鑄燕人之  
巧皆長於為函秦人之巧皆長于為廬胡人之巧皆  
長于為弓車故雖天下之良工吾知其不容于四國  
凡以無所用其長而施其巧也是以粵無鑄工非無  
鑄工也以其人皆能為鑄故也燕無函工也非無函  
工也以其人皆能為函故也秦無廬工也非無廬工  
也以其人皆能為廬故也胡無弓車工非無弓車工  
也以其人皆能為弓車故也古者處工于官府使工  
與工言器段氏為鑄函人為甲廬人為廬器弓人為  
弓輿人為車皆以官府處之所謂無者非無是人也官  
府無是工故也詩曰序乃錢鑄則鑄者治田之器也  
先儒謂粵地出金錫鑄治之業田器尤多孟子曰函  
人惟恐傷人則函者甲冑之屬也先儒謂燕近強胡

習作甲冑盧戈戟之秘也先儒謂秦多細木善作矜秘  
弓車射乘以攻戰先儒謂匈奴無屋宅田獵畜牧逐  
水草而居皆知為弓車則四國之  
無是工皆以夫人能為之故也

知者創物巧者述之守之世謂之工百工之事皆聖人

之作也爍金以為刃凝土以為器作車以行陸作舟以

行水此皆聖人之所作也

知音智創初亮反  
爍始灼反又作鑠

形而上者謂之道形而下者謂之器道本於性命而  
器之理藏乎其中器成於度數而道之迹顯於其外  
君子上達則其智足以窮理而能創小天下達則其  
巧足以循迹而能述益發而制之謂之創非智足以  
窮性命之理則不能及此故曰智者創物分辦而審  
其才謂之述非巧足以循度數之迹則不能及此故

曰巧者述之大司徒曰以世事教能則民不失職古者四民莫不皆然而百工之于官府也其父兄之教不肅而成其子弟之學不勞而能少而習焉其心安焉不見異物而遷焉故攻木之工不使之攻金攻皮之攻不使之攻玉臬氏之子常為量魯氏之子常為鍾挑人之子常為劍函人之子常為甲其所傳者一法而各使之精其事焉故曰守之世謂之工雖然此特循法度之迹而守之也若夫得之于手應之于心則輪扁之斲輪也不能以授之子况可得而世也易曰備物致用立成器以為天下利莫大乎聖人蓋百工之事雖形于度數之粗而天下之至精寓焉非聖人降道以觀象出象以觀器孰能作之哉故斲木為杵掘地為臼曰杵之利則取諸小過弦木為弧剡木為矢弧矢之利則取諸睽或為耒耜以取諸益或為網罟以取諸離為棟宇則取諸大壯為棺槨則取諸大過一方一圓而具天地之象一奇一耦而具陰陽

之數或曲或直而有剛柔之理或厚或薄而有盈虛  
之義形名既定而不可易分守既明而不可亂豈淺  
淺者之所能及哉傳曰作者之謂聖殆以此也是故  
燦金凝土作為舟車一切皆本于聖人以金為體者  
以火為用故于金言燦以土為體者以水為用故於  
土言凝陸行乘車則千里可致水行乘舟則江河可  
濟凡此之類皆聖人立法以貽天下後世也然前言  
智者創物而于此又言皆聖人作者蓋大而化之之  
謂聖聖者智之體也窮理而有所知謂之智智者聖  
人之用也孟子曰始條理者智之事亦以其用而言  
之也終條理者聖之事亦以其體而言之也方其從  
體以起用則凡創物者必資于智之所知故以智者  
言之及其攝用以歸體則百工之事無非聖之所化  
故以聖人言之惟以智言故曰創以創者發而劑之  
即其見于度數者而言之也惟以聖言故曰作  
以作者為而起之原其生出之自而言之也

天有時地有氣材有美工有巧合此四者然後可以為  
良材美工巧然而不良則不時不得地氣也橘踰淮而  
北為枳鸚鵡不踰濟貉踰汶則死此地氣然也鄭之刀  
宋之斤魯之削吳粵之劍遷乎其地而弗能為良地氣  
然也燕之角荆之幹妘胡之筍吳粵之金錫此材之美  
者也天有時以生有時以殺草木有時以生有時以死  
石有時以泐水有時以凝有時以澤此天時也

枳吉氏  
反鸚其

俱反鶴音欲濟子禮反貉戶各反汶音問水名削思  
約反妘扶云反筍古老反註讀為橐泐音勒澤音亦

又音釋

立天之道曰陰與陽立地之道曰柔與剛陰陽寒暑  
運之以為時者也故曰天有時剛柔燥濕在地化之  
以為氣者也故曰地有氣萬物盈于天地之間得時  
以生得氣以成及其成材則天地之美具焉故曰材  
有美天地無全功萬物無全用而合和成就實有資  
于巧者故曰工有巧此四者皆有以相成無以相廢  
合而用之闕一不可故曰合此四者然後可以為良  
良甚善也天之合也若不慮而知則謂之良知不學  
而能則謂之良能皆出於天合之自然而非人為之  
或使也苟其取材也上不得天合之時下不得地之氣  
雖有得材之美與夫得手應心之巧是成於人為之  
成使非自然之甚善也其可以為良乎是故斬穀之  
道必矩其陰陽其斬陽木則必以仲冬其斬陰木則  
必以仲夏弓人之為弓于冬則析幹於春則液角於



夏則治筋于秋則合三材此所以因天時也貢金錫則責之揚貢柁幹則責之荆孤桐則貢于徐漆臬則貢于豫以至于鄭之刀宋之斤魯之削吳粵之劍此所以因地氣也相幹則欲其赤黑而鄉心陽聲而遠根相筋則欲小簡而長大結而澤漆則欲測絲則欲沈以至燕之角荆之幹胡之筈吳粵之金錫凡此皆材之美也輪人之為輪則可規可萬可水可縣可量可權輿人之為車則圓者中規方者中矩立者中縣衡者中水直者如生繼者如附三材既具巧者和之以為輪六材既聚巧者和之以為弓凡此皆工之巧也列子曰天職生覆地職形載物職所宜蓋變者天道也而天道之所變者生化者地道也而地道之所化者形然天道遠而尊地道近而親則物性之所宜亦繫諸地而已自橘踰淮而北為枳以至貉踰汶則死此地道之化也自鄭之刀以至遷乎其地而弗能為良此物性之宜也自燕之角以至吳粵之金錫

則物之有用者存乎材也自天有時以生以至有時以澤則物之有體繫乎天若五方之土各有所偏五土之物各有所宜結而為山嶽其形不類融而為江河其流不一橘踰淮而北為枳則植者因之而不同也鸚鵡不踰貉踰汶則死則動者因之而有異也而非特此也至於工飭之而為器亦然以刀之良則必求之鄭而不可以求之宋以削之良則必求之魯而不可求之吳粵此亦物性之宜資於地氣者然也至于角之美者莫如燕幹之美者莫如荆筍莫美于妘胡金錫莫美于吳粵則入養之為材亦因其地氣之為美也天有時以生有時以殺則陰陽之運所以生殺萬物者也草木有時以生有時以死則感陰陽之運而生死者也石有時以泐或以盛暑而解散也水有時以凝澤或以寒溫而融結也此天時地氣材美之不同而工之巧當審焉故不言工巧也

凡攻木之工七攻金之工六攻皮之工五設色之工五  
刮摩之工五搏埴之工二攻木之工輪輿弓廬匠車梓  
攻金之工築冶鳧臬段桃攻皮之工函鮑鞞韋裘設色  
之工畫績鍾筐幌刮摩之工玉柳雕矢磬搏埴之工陶

旒

刮古八反搏音團埴時職反臬古栗字段鍛同鮑音薄鞞音運績戶對反幌莫黃反柳音擗旒甫罔反

天生五材民並用之水火木金土是也加之皮玉設色則為八材焉九職所謂百工飭化八材是以以土治水以水治火然後水火為用以火治金以金治木然後金木為器皮玉設色之事則亦不離于五者然後搏埴者之工備此百工之務也攻木之工木工也攻金之工金工也搏埴之工土工也金木言其體搏

埴言其用攻皮之工以函為主設色之工以畫為主  
刮摩之工以玉為主皮色言其體刮摩言其用若夫  
水火之材則飭化之以運用此六者而已故于水火  
不言工輪輿弓廬匠車梓者輪人為輪輿人為車弓  
人為弓廬人為廬器匠人為宮室之屬車人為耒之屬  
梓人為筍廬之屬此攻木之工七也築冶鳧稟段桃者  
築氏為削冶氏為戈戟鳧氏為鐘稟氏為量段氏為鎛  
桃氏為劍此攻皮之工五也畫績鍾筐恍者畫績之事  
官異而職同鍾氏則染羽恍氏則練絲而筐氏闕焉此  
設色之工五也陶人為甌甗人為簋此埴埴之工二也

### 有虞氏上陶夏后氏上匠殷人上梓周人上輿

體常而盡變者道也聖人體道之常以處已故先聖  
後聖同乎一揆彼時此時同乎一心若合符而无異  
矣盡道之變以趨時故觀會通而行典禮揆時物而  
備制作此四代所以有異上矣是故時方上質不以

文滅質時方上文不以質勝文其所以立成器而為天下利者亦審所尚而已虞夏之文不勝其質然夏之質又不若虞之純故有虞氏上陶夏后氏上匠商周之質不勝其文然商之文又不若周之備故商人上梓周人上輿有虞氏以德而帝而純樸未散陶工為器則質之純也故上陶記言秦有虞氏之尊又曰有虞氏之瓦棺則上陶可見矣夏后氏以業而王而營制稍興因上匠而為宮室溝洫以居處灌溉則質之散也語言禹卑宮室而盡力乎溝洫則上匠可見矣商則王者之道自此成矣王者之業自此著矣王盡制而禮樂之器不備則無以為文故所上者有在于梓所以為禮樂之器也至周則經制廣而庶事備苟一器之不完則經制之理未廣一物之不設則庶事之宜未備故所上者在於興以一器而工聚者於車為多也四代所尚亦各因時而已

故一器而工聚焉者車為多

車象三才而利轉通上下乘之其載有與其行有牙其服有軛其指有軛以憑為禮則有軛以道軛而為之先則有軛虛而善心則有轂運而無窮則有輪實輪而湊轂則有輻作止而由之則有軸以至為較為輻為軛為鞅蓋之圓以象乎天軛之方以象乎地其事詳其物重其義廣其制煩則工之所聚可謂多矣然自攻金設色之工而下其數或以五或以二而攻木之工獨有七焉則車工之為多可見矣

車有六等之數車軛四尺謂之一等戈秘六尺有六寸既建而迪崇於軛四尺謂之二等人長八尺崇於戈四尺謂之三等及長尋有四尺崇於人四尺謂之四等車

戟常崇於及四尺謂之五等酋矛常有四尺崇於戟四

尺謂之六等車謂之六等之數

秘兵媚切迪以氏反  
豈立殊反酋在由反

易曰立天之道曰陰與陽立地之道曰柔與剛立人之道曰仁與義兼三才而兩之故易六畫而成卦車有六等所以法易六爻之數也十分曰寸十寸曰尺八尺曰尋倍尋曰常兵車之輪六尺有六寸軹崇三尺有三寸加軹與轆之七寸為四尺是軹去地四尺矣故曰車軹四尺謂之一等自軹而下其車之等皆以四尺為差戈秘六尺有六寸則以四尺為差戈秘六尺有六寸則以四尺崇於軹故謂之二等人長八尺則以四尺崇於戈故謂之三等及長尋有四尺則以四尺崇於人故謂之四等車戟常則以四尺崇於及故謂之五等酋矛常有四尺則以四尺崇於戟故謂之六等始言車有六等之數終言車謂之六等之

數者蓋道冥於一則非有數也合於同則非有等也  
道散而為器則其差有等其別有數方其原車之等  
數所由起則自無而出有也故始則曰車有六等之  
數及其叙車之等所自陳則等數具而法象著其意  
可得而言之也故終則曰車謂之六等之數夫謂之  
為言意所寓也可以言論者物之粗也可以意致者  
物之精也車之等數以義則為精以事則為粗故可  
得以言而謂之也若夫言之所不能論意之所不能致  
者又安得而謂之也然五兵之用遠則弓矢者射之近  
則矛者句之句之矣然後及者擊之戈戰者刺之故  
司馬法曰弓矢圍及矛守戈戰助蓋凡用此者皆長  
以衛短短以救長今此戈矛及戰皆插車騎而獨不  
言弓矢者則乘車之人佩之也六等之車而五兵皆  
備豈先王得已而用之哉戈矛及戰置之於車傍者  
備而不用之意也弓矢則  
佩之在下非所上之意矣



凡察車之道必自載於地者始也是故察車自輪始凡察車之道欲其樸屬而微至不樸屬無以為完久也不

微至無以為戚速也輪已崇則人不能登也輪已庫則

於馬終古登阨也樸音刺反屬章欲反戚將六反又音促庫音婢阨文爾反

載物者莫先于車運車者莫先于輪昔之聖人觀轉蓬而為輪輪行可載然後為車則車之作輪實為之

先焉故察車之道有二一曰載于地者始二曰欲其樸屬三曰欲其微至車之材眾矣而載于地者輪而

已故察車自輪始輪之行以完久為固以戚速為利故不樸屬則無以為完久樸屬言其附著之堅也不

微至無以為戚速微至言其踐地之少也夫三年為車無一尺之輪則莫能運轉則車雖善載非輪其能

行乎木直中繩抹以為輪則其曲中規則輪雖善運  
非人其能為乎輪既為之于人苟不察其樸屬而微  
至則說輓之虞輪載之敗不旋踵而至矣轂以為利  
轉輻以為直指牙以為固抱輪人為之則斬三材必  
以其時三材既具巧者和之然後可以盡為輪之善  
也用車者必加于此蓋得其要矣不然則莊周天道  
何以獨取輪扁斲輪記考工者何以獨首于輪人與  
輪已崇則過于六尺六寸而軫過四尺為太高也人  
斯病于難登輪已庫則不及于六尺六寸而軫不及  
四尺為太下也馬斯病于難引故曰輪已崇則人不  
能登也輪已庫則于馬終古登阨也阨阪也終古猶  
言常也輪庫則馬高馬高則其引輪也常若登阪雖  
倍用力馬疲而  
車不進之矣

故兵車之輪六尺有六寸田車之輪六尺有三寸乘車

之輪六尺有六寸六尺有六寸之輪軹崇三尺有三寸也加軹與轆馬四尺也人長八尺登下以為節

乘繩證反軹音

只軹音卜又音僕

王有五路玉路以祀金路以賓象路以朝革路以即戎木路以田今此言兵車即革路也田車即木路也乘車即玉路與金路象路也禮官明其義故巾車謂之路事官制其器故考工謂之車兵車乘車駕國馬田車駕田馬輪俟馬而後行馬有高下而輪因之以立制故或言六尺有六寸或言六尺有三寸而數度之所以不同也然輪之心為轂轂之末為軹輿後橫木謂之軹軸上伏兔謂之轆輪崇六尺有六寸軹崇三尺有三寸而加軹與轆之七寸然後合而為四尺人長八尺則軹與軹之尺適于人為半矣凡此記輪

之崇而人之長短升降以此為節  
故曰人長八尺登下以為節矣

輪人為輪斬三材必以其時三材既具巧者和之轂也  
者以為利轉也輻也者以為直指也牙也者以為固抱

也輪敝三材不失職謂之完

牙音訝敝必世  
反又伏滅反

車雖器之一物然工之聚于此為多輪雖車之一物  
然車之行必先乎此故察車始自于輪此古者所以  
獨立輪人之官而記考工者亦以輪人為首歟輪雖  
一物體具三材轂輻牙是也天有時地有氣材有美  
工有巧合此四者然後可以為良故古者仲冬斬陽  
木仲夏斬陰木夫時有冬夏木有陰陽因其時而斬  
其木必得天地之和氣故曰輪人為輪斬三材必以  
其時轂輻牙之材生于天而成于人生于天則有莫

為之之和成于人則有或使之之和然則和者天也和之者人也故曰三材既具巧者和之非特是也弓人為弓取六材必以其時六材既聚巧者和之則聖人立成器以為天下利者豈苟乎哉老子曰三十輻共一轂當其無有車之用又曰有之以為利無之以為用轂中虛而有容是無有也而車賴之以為用故有取于利轉輻實輪而湊轂非無有也而車賴之以為利故有取于直指若夫牙則周園轂輻以運行其利用故有取于固抱惟利故能轉惟直故能指惟固故能抱合是三材以為輪輪雖歷久而體敝三材各處其所猶不失職是以謂之完也夫在物宜完者也在身宜完者元也元缺而不周則不可以為完元傷而在全則不可以為完然則三材所以為完者亦以其周而不缺全而無傷故也莊子曰不以物挫志之謂完此志之完完之在人者也輪人曰輪敝三材不失職謂之完此輪之完完之在物者也

望而眊其輪欲其慎爾而下也進而眊之欲其微至也無所取之取諸圜也望其輻欲其掣爾而織也進而眊之欲其肉稱也無所取之取諸易直也望其轂欲其眼也進而眊之欲其情之廉也無所取之取諸急也眊其綆欲其蚤之正也察其蓄蚤不齧則輪雖敝不匡

莫慎

歷反圜于權反掣音蕭稱尺證反眼魚懇反  
轉音疇綆音餅蚤音爪蓄側吏反齧音隅

輪命也一實一虛一有一無運而無窮無作則止所謂命者如斯而已輻畱也畱言其實也實輪而湊轂致福之道也轂轂也轂言其善也輪為善首則轂為善心此所以為穀也轂輻牙分而言之則謂之三材

合而言之則謂之輪言望其輻望其轂而不言望其  
牙則言望而眡其輪兼于牙矣輪貴于圜故欲其慎  
通而迪慎如巾之冪物言均致也迪若決圜而轉化  
言上下皆正直而不旁倚也微至則車止之時輪至  
地者少也此輪所以取諸圜也輻貴于易直故欲其  
掣爾而纖掣言殺削之貌纖言向牙之處尖而不大  
也肉稱則言其洪殺之等也易則無節目直則無撓  
曲此輻所以取諸易直也轂貴于急故欲其眼眼言  
如人之眼也目用作而體止焉蓋離為目巽為多白  
眼目者眼之用眼者目之體故眼之字左從目言其  
用之作也右從艮言其體之止也夫轂中虛而容輔  
以動轉亦何異于眼體止于外目作而視乎內憊之  
廉則下文所謂憊必負幹也憊則慢轂之革廉則廉  
隅之見于外惟憊之負幹其革急而不緩然後能至  
是此較所以取諸急也眼以其顯于外者言之廉以  
其隱于內者言之望者遠而觀之眡者近而見之也

望畧而視詳于輪，獨加望而眡者，察車自輪始，故特致其詳焉。綆謂輪，算下文所謂六尺有六寸之輪，綆三分寸之二是也。菑謂輻，入轂中，也。蚤謂輻入牙中也。凡造車輪，皆向外算，向外算則車行不掉，故曰眡其綆，欲其蚤之正，以輪之鑿孔取其正也。入牙之蚤與入轂之菑，上下兩相當而無齟齬之不齊，則輪雖久敝而無方而不轉之患，故曰察其菑蚤不齟，則輪雖敝不匡，匡言方也。凡物圓則運而轉，方則礙而止，故也。

凡斬轂之道，必矩其陰陽陽也者，稹理而堅陰也者，疏理而柔，是故以火養其陰而齊諸其陽，則轂雖敝不

斂

稹之忍反，敝婢世反，斂好角反，又呼報反。



萬物莫不由是而之焉者道也道無所往而不在故于大必備于小不遺雖稊稗瓦礫之微無不在焉故察車斬轂皆有道也用是道而察車則謂之察車之道用是道而斬轂則謂之斬轂之道凡木生于山南而向日則謂之陽生于山北而背日則謂之陰陽木則足于陽而寡于陰陰木則足于陰而寡于陽必齊其陰陽然後可用以為轂故必矩其陰陽將火養而齊之也傳曰五寸之矩則足以盡天下之方蓋矩者正立之法也矩其陰陽謂以法正之而已陽木則其體實故稊理而堅陰木則其體虛故疏理而柔稊叢緻也疏不密也堅至剛也柔至弱也稊與密以文言之堅與柔以材言之苟不以火灸其陰而養之使堅與陽齊則以革鞞木其陰柔之處必瘦減而不著木斯有斂暴之患矣故曰以火養其陰而齊諸其陽則轂雖斂不斂斂若斂氣出之貌故暴起謂之斂也

較小而長則柞大而短則擊是故六分其輪崇以其一  
為之牙圍參分其牙圍而漆其二椀其漆內而中誣之  
以為之較長以其長為之圍以其圍之防捎其較

柞莊  
百反

擊讀為槩誣邱勿反  
捎音蕭藪素口反

較以有為體以無為用故長短小大兩相稱然後利  
轉而不窮小而長則柞柞言其不廣也大而短則擊  
擊言其不堅也不廣則狹故內無所容不堅則脆故  
力不能固所謂六分其輪崇以其一為之牙圍者兵  
車乘車輪各六尺有六寸六分之而以其一為牙圍  
則牙圍尺有一寸矣三分其牙圍而漆其二者就尺  
有一寸取九寸而三分之各得三寸又以二寸而三  
分之則各得六分有奇合二分而言之則漆者七寸

三分寸之一不漆者三寸三分寸之二不漆謂輪之踐地處者也所謂棹其漆內而中誦之以為之轂長以其長為之圍者棹言度兩漆內之尺寸也牙圍不漆者內外面各一寸則六尺六寸之輪其漆內凡六尺四寸也中誦之則于中誦其半是為三尺有二寸故以三尺有二寸為轂之長以其長為之圍則亦三尺二寸矣以其圍之防指其藪謂眾輻所趨之地也防與王制所謂祭用數之防同也以繫辭歸奇于防以象圍者言之則防為四分之一矣指取也謂于轂圍取四分之一以為眾輻所趨之地則數凡八寸矣

五分其轂之長去一以為賢去三以為軹容轂必直陳篆必正施膠必厚施筋必數幬必負幹既摩革色青白

謂之轂之善

去起呂反賢胡眇反軹音只篆直轉反數色角反幬音籌

車輻頭大穿而為賢小穿而為軹謂之賢者有取于  
宜為人臣佑上而利下之意謂之軹者蓋轂有圍以  
利轉至軹而窮焉有宜只之意轂長三尺有二寸徑  
一尺三分寸之二五分其徑之長去一以為賢則賢  
徑八寸十五分寸之八去三以為軹則軹徑四寸十  
五分寸之四賢之徑倍于軹則大穿為甚大鄭氏疑  
其誤以去一宜為去二理或然也然則大穿去二則  
得六寸五分寸之二矣治轂者為之形容則欲其直  
而不曲陳以夏篆之屬則欲其正而不邪故曰容轂  
必直陳篆必正施膠欲固則貴厚而不薄施筋欲強  
則貴數而不疏故曰施膠必厚施筋必數恃以慢轂  
則欲廉之外見故貴其負幹則其革急而不緩轂革  
相應而無所不足之患矣若夫以革鞞轂將漆之  
先以骨丸之乃摩以石其色以青白為上故曰既摩革  
色青白謂之轂之善蓋青陽中之色也白陰中之色  
也陰陽中則和而無剛柔相勝之弊轂之運轉以和

為貴  
故也

參分其轂長二在外一在內以置其輻凡輻量其鑿深以為輻廣輻廣而鑿淺則是以大抗雖有良工莫之能固鑿深而輻小則是固有餘而強不足也故竝其輻廣以為之弱則雖有重任轂不折

量音良鑿曹報反深尸鳩反抗五骨反強其良

反竝獲  
耕反

三分其轂長二在外一在內以置其輻此言置輻于轂相去遠近也轂長三尺有二寸而輻廣三寸半其餘二尺有八寸而三分之輻外一尺九寸故曰二在外輻內九寸半故曰一在內鑿深者言轂之深足以

受輻之入也輻廣者言輻之廣足以應轂之所受也二者相應則其固足以相佐而反是則非輻之善輻廣而鑿淺則是以大扞雖有良工莫之能固大扞言其動搖之甚也鑿深而輻小則是固有餘而強不足固有餘以鑿言也強不足以輻言也善為輪者度其輻廣以為之弱則其力相稱足以任重而致遠竝言度其長短故曰茲其輻廣以為之弱則雖有重任轂不折

參分其輻之長而殺其一則雖有深泥亦弗之濂也參

分其股圍去一以為骹圍

殺色界反濂註讀作黏女廉反骹胡飽反

凡為輻欲其豐殺適宜近轂則欲豐而近牙則欲殺且以輻長尺有二寸而三分之則其殺四寸也蓋牙所以行地于近牙而殺之雖以行塗而深泥弗粘也輻近轂曰股近牙曰骹在股則豐若人之髀股在骹

則約若人之脛近足之骸以輻三分之長殺一以向  
牙以股三分之圍去一以為骸則本大末小此所以  
深泥莫  
之粘也

揉輻必齊平沈必均直以指牙牙得則無槩而固不得

則有槩必足見也

揉而九反槩魚  
列反見賢適反

火剛而善變凡物之曲直者資其用以正焉水平而  
無私凡物之輕重者資其體以定焉揉輻以火而齊  
其曲直之句倨故曰揉輻必齊者取諸易直故也沈  
輻以水而均其輕重之淺深故曰平沈必均者故其  
肉稱故也然輻資牙以指牙資輻以抱兩者相得則  
無用于槩而自固故曰直以指牙牙得則無槩而固  
不得則雖用槩以行而搖動則槩出而見  
矣故曰不得則雖有槩而行必足見也

六尺有六寸之輪，綆參分寸之二，謂之輪之固。

綆方頰反參音

三

前言兵車乘車之輪皆六尺有六寸又曰眠其綆欲其蚤之正則輪筭之制尚矣故鑿牙之時其孔向外侵三分寸之二使輻股外筭蓋輪筭則車行安帖而不掉夫是謂之輪之固

凡為輪行澤者欲杼行山者欲侔杼以行澤則是刀以割塗也是故塗不附侔以行山則是搏以行石也是故

輪雖敝不覲於鑿

杼直呂反侔芒侯反搏徒丸反覲音吝又音鱗本作鄰

三分其股圍去一以為散圍者此輪之常制也至於行山行澤又加損焉以從其宜是以行澤必于散圍



者薄之故欲杼杼言削薄其踐地者行山必于股散皆等也故欲侷侷言上下之適等也澤水地也行澤者以薄為和故杼以行澤則是割塗而塗不附山石地也行山者以厚為利侷以行山則是搏以行石而輪雖徹不執于鑿蓋石雖齧之而其鑿不動也

凡揉牙外不廉而內不挫旁不腫謂之用火之善

挫作卧反

凡揉木者宜審曲面執順其形性之自然而屈之以火遠而逆之則外廉而絕理內損而挫折中旁腫負而起善揉牙者無此三患然後可以成固抱之功是故謂之用火之善傳曰恃自負之木則于歲無輪荀卿曰木直中繩揉以為輪其曲中規皆成於矯揉之善也

是故規之以眡其圓也萬之以眡其匡也縣之以眡其

輻之直也水之以眡其平沈之均也量其藪以黍以眡其同也權之以眡其輕重之侔也故可規可萬可水可

縣可量可權也

謂之國工

萬矩同  
縣懸同

規矩之正

方圓準繩以正平直權以正輕重量以正

多寡凡為器

而具此六者莫如輪也圓者中規方者

中規設規

之以眡其圓矩之以眡其直欲其應于繩也

矩匠言其方

也縣之以眡其輻之直欲其應于繩也

水之以眡

其平沈之均權之以眡其輕重之侔欲其

應於權也

量其藪以黍以眡其同欲其應於量也可

規可矩可水可

縣可量可權而輪無不善則國人無

以過其巧故曰

國工夫士善於一國則謂之國士若

工巧於一國則

謂之國工宜矣

周禮詳解卷三十五

欽定四庫全書

經部

周禮詳解卷三十六至四十一

詳校官監察御史臣祝德麟

刑部郎中臣許兆椿覆勘

總校官進士臣朱 鈐

校對官中書臣宋枋遠

謄錄監生臣俞泰階

欽定四庫全書

周禮詳解卷三十六

宋 王昭禹 撰

輪人為蓋達常圍三寸程圍倍之六寸信其程圍以為

部廣部廣六寸部長二尺程長倍之四尺者二程音盈 信音申

廣古 曠反

輪輻三十以象日月蓋弓三十有八以象星其形

圍其數耦此輪人所以為蓋也蓋之制上為部中  
為達常下為程部之旁為弓部蓋斗也達常蓋斗  
柄也程蓋杠也弓蓋捺也達常小於程程小於部

故非部無以納弓於其旁非程無以含達常於其中達常圍三寸圍三徑一則徑一寸矣程圍倍之六寸圍三徑一則徑二寸矣信其程圍以為部廣部廣六寸者廣謂徑也取程圍以為部廣則部徑六寸而為尺有八寸也名之為部者言蓋斗四面鑿孔內蓋弓著於上部高隆穹然故謂之為部也部長二尺者此部謂斗柄達常也以此達常上部中遂名之為部也程長倍之四尺者二以其程之長倍於部長則凡八尺矣故曰四尺者二斗柄謂之達常者上下通焉謂之達終始無變謂之常斗柄上通於部下通於程以通乎上下為達無變為常故謂之達常也蓋杠謂之程者立乎下蓋之材賴之以呈焉故謂之程也蓋斗謂之部者部如部伍之部有所思而通也蓋斗納衆弓而通之也故謂之部也

十分寸之一謂之枚部尊一枚弓鑿廣四枚鑿上二枚鑿

下四枚鑿深二寸有半下直二枚鑿端一枚

鑿才報反

百工之于數有所謂三分寸九分寸二十七分寸八  
十一分寸者以三乘之也如三分寸則以一寸三分  
之推而至千八十一分寸亦然矣有所謂五分寸十  
分十五分寸二十分寸七十五分寸者以五乘之也  
如五分寸則以一寸五分之推而至于七十五分寸  
亦然矣今言十分寸則以一寸十分之也然十分寸  
之一謂之枚則枚一分矣枚如條枚之枚自本上生  
者為枚自枚上生者為條枚為大條為小故數物以  
枚數事以條以一物而衆事附焉故也蓋以部為大  
故以部之分而謂之枚以一部而衆弓附焉故也部  
尊一枚者蓋斗高一寸也弓鑿廣四枚者鑿孔大四  
分也鑿上二枚者鑿孔之上無所受故二分也鑿下

四枚者鑿孔之下有受故四分也兩四一二則部厚一寸矣鑿深一寸有半者部廣六寸鑿深二寸有半則對五寸矣是以不傷達常也下直二枚以其弓之入于鑿者曲二分則直而近下者深二枚也鑿深二枚者言鑿端之一分取其狹也

弓長六尺謂之庇軹五尺謂之庇輪四尺謂之庇軫

庇方

二反

車有小大故蓋弓有長短弓有長短故所覆有廣狹蓋輿廣六尺六寸兩轂并六尺四寸旁減軌內七寸則兩軹之廣凡丈一尺六寸以弓長六尺而倍之加部廣之六寸是為丈二尺六寸然弓有宇曲之減則其長可以覆軹而已不及軫焉故弓六尺謂之庇軹軹轂末也若夫軫之廣則小於輪而弓之降殺亦以



一尺為差故五尺謂之  
庇輪四尺謂之庇軫也

參分弓長而揉其一參分其股圍去一以為蚤圍參分

弓長以其一為之尊

蚤音  
爪

蓋弓之制短者近部平長者為宇曲三分弓長而揉  
其一則六尺之弓揉而為宇曲者二尺矣三分弓長  
以其一為之尊則六尺之弓尊而近部平者亦二尺  
矣弓近部平謂之股猶輻近轂之為股宇曲之末謂  
之蚤猶輻入牙之為蚤也股欲麓蚤欲細故三分其  
股圍去一以為蚤圍蓋以弓鑿之廣四枚方員之而  
為股圍則一寸六分也去股圍之一而為蚤圍則一  
寸十五分寸之一矣尊高也六尺之弓三分之則近  
部二尺為高矣故  
曰以其一為之尊

上欲尊而宇欲卑上尊而宇卑則吐水疾而雷遠蓋已  
崇則難為門也蓋已卑是蔽目也是故蓋崇十尺良蓋

弗冒弗紘殷畝而馳不隊謂之國工

卑音婢雷力  
又反殷音隱

上欲尊者上近部平之處也宇欲卑者下為宇曲之  
處也言上則知宇曲之為下言宇則知上之為弓部  
上高則其勢仰而隆宇卑則其勢俯而下此其所以  
吐水疾而其雷及于遠歟易以坎為弓輪者蓋弓以  
吐水言其流而不積也蓋崇十尺多乎十尺則為太  
崇而於門難為容寡乎十尺則為太卑而于目有所  
蔽人長八尺則蓋崇十尺乃其中制也故曰蓋已崇  
則難為門也蓋已卑是蔽目也是故蓋崇十尺古之  
為蓋者必期于甚善弗冒者弗以衣覆之也弗紘者  
弗以絲繫之也弗冒以衣弗繫以絲雖中畝而馳宜

隊而不隊則蓋弓所以入于部者固而不可搖  
故曰良蓋弗冒弗絃殷畝而馳不隊謂之國工

輿人為車輪崇車廣衡長參如一謂之參稱參分車廣  
去一以為隧參分其隧一在前二在後以揉其式以其  
廣之半為之式崇以其隧之半為之較崇六分其廣以一  
為之軫圍參分軾圍去一以為式圍參分式圍去一以  
為較圍參分較圍去一以為軾圍參分軾圍去一以為

鞞圍

稱去聲隧雖遂反  
較古學反鞞音對

處車中以舁人者輿也挾車旁以踐地者輪也橫車  
前以扼馬者衡也輪崇車廣衡長皆六尺有六寸故

曰三如一謂之三稱車與廣狹其實一也與者車之始車者輿之成不曰輿廣而曰車廣則言其成而已因輿以為深淺者隧也所憑撫以為禮而式之者軾也車有六等兼三才而兩之以效于此者較也方而不運物得參焉者軫也轉有軾不入于軾而宜只者軛也乘者君子而對乘者駟也三分車廣去一以為隧者隧四尺四寸也三分其隧一在前二在後以揉其式者式深四寸三分寸之二也以其廣之半為之式崇者以車之廣而半取之則軾崇三尺三寸也以其隧之半為之較崇者隧之半則二尺二寸也六分其廣以其一為之軫圍者以車廣六分用其一則尺一寸也三分軾圍去一以為式圍者以軾圍三分去其一則是七寸三分寸之一也三分式圍去一以為較圍者以式圍三分去其一則四寸九分寸之八也三分較圍去一以為軛圍者以較圍三分去其一則三寸二十七分寸之七也三分軾圍去一以為駟圍

者以軛圍三分去其一則二寸八十一分寸之十四也自隧以下鄭氏皆以為兵車之制兵車如此則乘車可知矣

圜者中規方者中矩立者中縣衡者中水直者如生焉

繼者如附焉

中丁仲反

權與物鈞而生衡衡運生規規圍生矩矩方生繩繩直生準規矩誠陳則不可欺以曲直權衡誠設則不可欺以輕重與人之為車為圜必以直中於繩衡者其為方必以矩而自中于矩立者其直中於繩衡者其平中於水直者直達而不屈如木生於地繼者膠合而不離如枝之附于幹也以人為之功而類于天性之自然非工之巧何以與此

凡居材大與小無并大倚小則推引之則絕

居如字 舊音據

居其所而安者居也若倨則以其遇人而居不為變動也若踞則以其居佩之中無所移易也善居材者亦使之居其所而安無變動移易之弊則或大或小各適其宜也蓋用材有小大則其質有強弱善居材者取大小強弱得其正而已故大與小無并并謂偏邪相就也蓋大強而小弱以大而倚小是大與小相并也小者弱而其強不堪必為大者所挫而推矣既催矣又從引而行之則小者絕而不屬是理之必至者也故曰引之則絕而已

棧車欲弇飾車欲侈

棧士板反 弇於驗反

棧車則巾車所謂士乘棧車是也飾車則巾車所謂孤乘夏篆脚乘夏縵大夫乘墨車是也凡為車輓與

以革則載於中者固鞆轂以革則運于旁者固有革則易以壞飾車有革以鞆故欲侈言縱而向於外也棧車無革以為鞆故欲弇言斂而向于內也

輶人為輶輶有三度軸有三理國馬之輶深四尺有七寸田馬之輶深四尺駕馬之輶深三尺有三寸軸有三理一者以為媿也二者以為久也三者以為利也軌前

十尺而策半之

輶張留反  
軌音犯

輶車鞆也以人在右挾之能出圍而有所之則謂之鞆以其載欲準行欲利以需為病以覆為戒則謂之輶夫車之運雖在于輪輪之進實本于輶此先王所以設官以為輶而輶人之職所以立也輶有三度則

國田驚馬其轄之深淺各異數是也軸有三理則為  
嫩為久為利其輪之用各有常而不可外是也國馬  
鄭氏謂種馬戎馬齊馬道馬也種馬駕王路戎馬駕  
革路齊馬駕金路道馬駕象路馬高八尺車軹崇三  
尺有三寸加軹與轄七寸并轄深四尺有七寸則衛  
高八尺七寸也除馬之高則餘七寸為銜頸之間矣  
田馬駕木路馬高七尺車軹崇三尺一寸半加軹與  
轄五寸并轄深四尺則銜高七尺七寸也驚馬駕役  
車馬高六尺車軹崇三尺加軹與轄四寸并轄深三  
尺有三寸則銜高六尺七寸也此轄之有三度者也  
一者以為嫩則軸之材欲其嫩而無惡二者以為久  
則車之體欲其堅而可久三者以為利則軸之勢欲  
其利而易運此軸之有三理者在軹前則為之凡  
者軹也御者所執以制馬而使齊者策也轄軹以前  
其長十尺策半則五尺也以策五尺則御  
者執之適可以及馬而無過與不及故也



凡任木任正者十分其輻之長以其一為之圍衡任者五分其長以其一為之圍小於度謂之無任

因其材之所勝而用之謂之任任木者以其材之大小稱其任之輕重而已如任官焉各稱其才之長如任民焉各稱其力之所能不以大材而當任之輕不以小材而當任之重各適其宜而已故輻人之任木任正者十分其輻之長以其一為之圍衡任者五分其長以其一為之圍小於度者則謂之無任任正者謂輿下三面材以持車正者也輻軌前十尺與隧四尺四寸凡丈有四尺四寸任正之圍取其十分之一則凡尺有四寸五分寸之二矣衡任者謂兩輓之間也衡長六尺有六寸衡任之圍取其五分之一則凡一尺三寸五分寸之一矣故曰衡任其度數如此則其材苟小焉則其力不足以勝其任故謂之無任

五分其軫間以其一為之軸圍十分其輈之長以其一為之當兔之圍參分其兔圍去一以為頸圍五分其頸圍去一以為踵圍

軾間六尺有六寸軸圍五分而取其一則一尺三寸五分寸之一也當兔謂輈當伏兔者也輈之長丈有四尺四寸當兔之圍十分而取其一則尺有四寸五分寸之二而去其一則頸圍九寸十五分寸之九也踵謂在後承軾者也於頸圍九寸十五分寸之九而去其一則踵圍七寸七十五分寸之五十一也

凡揉輈欲其孫而無弧深今夫大車之輈擊其登又難既克其登其覆車也必易此無故唯輈直且無撓也是

故大車平地既節軒擊之任及其登阨不伏其轅必縊

其牛此無故唯轅直且無橈也

孫音遜夫音符擊輕同覆音福易去聲阨音矢

凡輶之深或四尺或三尺有三寸或四尺有四寸必以火揉之使其勢曲直然後可以為深雖欲其曲而深然又不可過于曲若弧深則過于曲矣過于曲則易折非經久之道也故凡揉輶欲其孫而無弧深孫如公孫碩膚之孫言審曲而順理也苟逆理而不孫非特難揉亦易傷折矣此揉輶所以先於孫歟大車之轅擊者大車牛車也擊言其至謂其勢直而下至也蓋輶雖不過於弧深然亦不可失之于直直則其勢下至非特登上阪地為難其傾覆且易矣此其故非他以其揉之不曲而深故曰唯轅直且無橈也大車平地既節軒擊之任者軒言其高而上于擊言其俯而下至既節軒擊之任則高下適中而無上干下

至之患矣六月之詩曰戎車既安如輕如軒以其適  
軒輕之中此戎車所以安也夫大車于平地雖能節  
其軒輕之任若其登陔地之地牛不退而偈伏其轅  
則轅必重而縊繫其牛頸此亦其轅直無橈之故也

故登陔者倍任者也猶能以登及其下陔也不援其邸

必緇其牛後此無故唯轅直且無橈也

援音袁邸丁禮  
反緇音秋故書

作鯁與  
緇同

凡登陔者自下而上其用力為多故謂之倍任夫登  
陔雖倍任然力之強者猶能以登及其下陔不援摩  
其車之邸則車或進而緇絆牛之後此亦以轅直而  
無橈之故也由此觀之則轅雖不可以過曲亦不可  
以不曲此軒之三度所  
以其深皆有常數也

是故輶欲頡典輶深則折淺則負輶注則利準利準則

久和則安輶欲弧而無折經而無絕

頡苦狠反  
典音殄

頡如頡人其頡之頡言其長也典如六典之典言其有常也欲頡典言欲其長而有常也蓋輶之長丈有四尺四寸過乎此則其長為有餘而贊不及乎此則其長為不足而虧有餘而贊不足而虧非法度之常也故欲頡典而已輶深則折淺則負者深則所謂弧深也揉之太深而傷其力故不進而易折淺則所謂直而無撓也揉之或淺則馬引之而難進故倍任而如負輶注則利準者蓋輶所以駕馬其引而進也若水之注然無凝滯之患者以其行則利而載則準故也利準則無傾覆之敗此所以能長久也夫無深折淺負之病而有注則利準之效其登阨與其下阨也不伏其輶不緇其牛此輶之和也唯和則無折負進

若與馬謀退若與人謀在馬則無契需之病在人則無左捷衽弊之患人與馬皆適此車之馳驅所以不危而安矣荀卿曰馬駭輿則君子不安此輈不和之效也輈欲弧而無折經而無絕者輈欲如弓之形而不可以太深太深則折矣木之直理為經輈欲順木理而為之不可以斷絕逆理而不經斯絕矣

進則與馬謀退則與人謀終日馳騁左不捷行數千里馬不契需終歲御衣衽不敝此唯輈之和也勸登馬力馬力既竭輈猶能一取馬良輈環澗自伏兔不至軌七

寸軌中有澗謂之國輈

輈音倦矣苦結反需如字一讀為懦澗子肖反

馬所以駕車車之進則以馬行為主故進則與馬謀人所以馭馬車之退則以人馭為主故退則與人謀

謀者指事而圖之也進與馬謀則得之于此而應之于彼也退與人謀則得之于手而應之于心矣種馬駕玉路戎馬駕革路齊馬駕金路道馬駕象路田馬駕木路凡車之任重致遠者皆馬之力也故進則欲其與馬謀大僕馭玉路齊僕馭金路道僕馭象路田僕馭木路凡車之疾徐進退惟人之馭也故退則欲其與人謀叔于田之詩有言兩駮如舞兩駮如手以言馬之節適也有言兩服齊首以言馬之整序也如是則駮之和而進與馬謀可知矣叔于田之詩言執轡如組以言其馭之巧駮鐵之詩曰六轡在手以言其馭之良也如是則駮之和而退與人謀可知矣終日馳騁而左不捷者言駮之和則尊者左而無蹇倦之病也行數千里而馬不契需者合而相倚曰契緩而不進曰需言駮之和則馬雖行數千里之遠而无契需之患也終歲御衣衽不敝衽謂裳車行而无搖動之勞則馭者衣衽亦無傷敝之害也凡此數者

自非輶之和孰能致是哉然則為輶者既有淺深之數與其高下之度而又五禁以致文飾環灑以受霜露故以之鳴和鸞而不失相應之節以之逐水曲而不失周旋之儀舞交衢則馭者以之良過軍表則射者以之善此亦惟輶之和也輶和則馬之行也易為力莫不勇于進而无疲倦之患故能勸登馬力也馬力既竭謂馬行而已止也馬行已止而无所用力輶猶能一進而取道豈非輶之利而能然歟良輶環灑者詩曰五禁良輶蓋輶之上為之纏固其禁有五被之以筋膠而環飾之以漆故謂之環灑也自伏兔至軌蓋如式深尺有四寸三分寸之二也自伏兔不至軌七寸則是半有灑也以輶之長大有四尺四寸灑之所至者丈有三尺三寸其不至者唯七寸而已則輶無傷齒之敝而其文飾常存非國工之巧其能及此乎故輶中有灑謂之國輶國輶猶言國工也指其人之巧而言之有以蓋一國馬則謂之國工指其器



之良而言之有以蓋一  
國焉則謂之國輔矣

軫之方也以象地也蓋之圜也以象天也輪輻三十以  
象日月也蓋弓二十有八以象星也龍旂九旒以象大  
火也鳥旗七旒以象鶉火也熊旗六旒以象伐也龜蛇  
四旒以象營室也弧旌枉矢以象弧也

軫輿後橫木旗旒之所今也夫軫之方以象地方地  
事也方而不運故物參焉蓋合二十八弓周圜以為  
圓也天有二十八星環列乎四方故蓋以二十八弓  
象星之周圍乎天蓋在上以覆乎下故象天體之圓  
軫在下以承乎上故象地體之方聖人與天地合其  
德其德之高明足以配天其德之博厚足以配地故

蓋軫之所象者如此蓋之圜以位乎上軫之方以位乎下聖人乘馬以位乎其中則三才之道備矣夫三十輻共一轂當其无有車之用蓋有之以為利无之以為用者天之道也聖人之道亦不外乎是故輪輻三十以象日月也日显乎晝月显乎夜相推以生明而其運未始有窮常以三十日而合宿輻之實輪其運轉亦未始有窮其數亦不過乎三十聖人與日月合其明故輪輻之所象如此也天之所恃以垂象者星也蓋之所恃以庇下者弓也二十八星環列乎天之四方蓋之圜以象天故以二十八弓謂之庇軫蓋之有弓闔闢有節猶天之列宿隱見有時焉此蓋弓二十有八所以象星也然則聖人取象于天地日月星辰以寓于車輿之間豈徒為觀美而已哉凡以載道而與之俱故也交龍為旂諸侯之所建以象蒼龍之星蒼龍東方之星也其屬有尾尾有九星故龍旂則九旂鳥隼為旟州里之所建以象鷩火之星也鷩

火南方之星其屬有七星故鳥隼則七旂熊虎為旗師都軍吏之所建以象白虎之星也白虎西方之星其屬有參參有六星故熊旗六旂龜蛇為旒縣鄙之所建以象玄武之星也玄武北方之星其屬有營室營室與東壁連體而有四星故龜蛇四旂弧旌所以張綵之幅也覲禮曰侯氏載龍旂弧韜則旌旗之屬皆有弧也又為之枉天以象弧星之有矢也夫星者天之象天之垂象以見吉凶使人視而從之先王之建旗亦使各率其所屬使其屬視而從之此自龍旂而下所以皆取象于星也夫登三辰于旗所以昭其明惟王之德與日月合其明故王建日月之常而其實則象星焉

攻金之工築氏執下齊冶氏執上齊鳧氏為聲臬氏為量段氏為鑄器桃氏為刃金有六齊六分其金而錫居

一謂之鍾鼎之齊五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之大刃之齊五分其金而錫居二謂之削殺矢之

齊金錫半謂之鑿燧之齊

齊才  
細反

攻金之工六築冶鳧卓段桃氏也金一也以為器則不一工之為器各有能焉為削者不可使為殺矢為鑿燧者不可使為鍾鼎為大刃者不可使為斧斤因能用而隨器而使此攻金之工所以有六也凡以金為器必濟之以錫蓋金性堅剛而錫則柔與金或赤黑而錫則青白以柔與而濟堅剛則其為器也不折以青白而濟赤黑則其為色不滯然所用之錫各隨其宜而有多寡之不同此所以有上齊下齊之異也

多錫為下齊築氏為削五分其金而錫居二則用錫為多矣故曰執下齊少錫為上齊冶氏為戈戟四分其金而錫居一則用錫為少矣故曰執上齊以削為下齊而言築氏執之則大刃鑿燧之屬皆下齊也以戈戟為上齊而言冶氏執之則鍾鼎斧斤之屬皆上齊也舉築冶而其它可知矣鳧氏為聲則鍾鐃之屬是也桃氏為量則斗斛之屬是也段氏為鑄器則錢鏹之屬是也桃氏為刃則刀劍之屬是也金有六齊則鍾鼎一也斧斤二也戈戟三也大刃四也削殺矢五也鑿燧六也用錫以和金有多寡之異故其齊有六鍾以擊鼎以烹則用錫為最少故六分其金而錫居一斧以伐斤以斫則用錫宜差多故五分其金而錫居一戈戟皆用之以刺防其或挫折用錫宜多于斧斤故四分其金而錫居一凡此皆謂上齊者也大刀則戚揚之屬其刃為加大施之斬斫則防其易虧缺故三分其金而錫居一削畫刀也殺矢用諸近射田

獵也削以刻書殺矢中之則死皆欲其堅忍不脆其用錫又宜多于大刃故五分其金而錫居二鑿燧以取水火于日月或用以照以明白為上故用錫為最多而金錫相半焉凡此皆為下齊者也

築氏為削長尺博寸合六而成規欲新而無窮敝盡而

無惡

築之字從竹從廾從木廾木有節也削以裁書而治之方如二廾木而竹且有節焉故為削者名官曰築氏長尺博寸此為削制也十寸為尺十分為寸削之制過乎尺則為太長不及乎尺則為太短過乎寸則為太博不及乎寸則為太狹則長尺博寸者于用為宜矣必取乎土之成數則取其若土之能自成然後能成物也蓋為削者鍊冶其金使至于精又和之以錫而使之以堅忍得所是其有以自成也然後用之

以裁書是因其自成然後有以成物也則古之為器者豈徒以適用而已不說之法固寓乎其中然以長尺而累之則合六削適六尺矣故環而圍之其勢圍而足以成規夫規者正圓之器成規則不期于圓而其圍自中于規矣豈俟乎正之而後圍哉長尺博寸既有取乎土數之成合六成規又有取乎地數之中惟成為能无虧惟中為能有常而无虧者削之體也中而有常者削之用也蓋書所以著古昔之惛惛傳千里之志志以傳之當年則為不刊之典以施之後世則為不朽之法而削所以裁制其書者亦豈可苟哉則其體長尺而博寸其用合六而成規是所以稱其書也欲新而无窮者蓋制于形者久而必舊欲其日新其可得乎麗于數者久而必壞欲其無窮其可得乎削制于形而麗于數亦欲其新而无窮而已豈能必其新而无窮哉庖丁之解牛十有九年可謂久矣其刃若新發于硎亦欲新無窮之意也然欲新而

無窮亦可久而己非若道之能久也唯其形久而必  
舊故不能無削惟其數久而必壞故不能無盡然敵  
盡者亦其鋒銚之適于用者然也若其脊刃亦未嘗  
有虧缺之疵豈非無惡之謂歟凡此皆材美工巧之  
效也所謂魯  
之削不過也

# 冶氏為殺矢刃長寸圍寸銚十之重三垸

銚徒頂反  
垸音九

傳曰猶金之在鎔惟治者之所鑄蓋金以陰凝治以  
陽釋之使惟我所為以成物者也為戈戟必鎔金而  
為之故名官以冶氏為殺矢刃長寸圍寸銚十之重  
三垸者先儒謂似補脫誤在此蓋五分其金而錫居  
二謂之殺矢之齊治氏執上齊而此言治氏為殺矢  
殺天與戈戟異齊豈同工乎則治氏為戈戟非殺矢  
明矣殺矢乃司弓矢所謂近射田獵者是也以其中  
之則死故謂之殺矢必其刃之長則其中入不淺故



刃長寸圍寸鋌謂箭足入橐中者也鋌十之則其入橐中者凡一尺矢人所謂殺矢七分三在前四在後此亦言橐中之鐵鋌七分殺一以前也重三坑先儒謂坑量名也且為矢宜在矢入之職則為矢固非冶氏矣今矢人有所謂刃長寸圍寸鋌十之重二坑其文與此同差三為二必其脫誤在此無疑

戈廣二寸內倍之胡三之援四之已倨則不入已句則不決長內則折前短內則不疾是故倨句外博重三鏑戟廣寸有半寸內三之胡四之援五之倨句中矩與刺

重三鏑

句古侯反鏑色劣反  
中丁仲反刺七賜反

戈戟皆刺兵戈二刃戟三刃則戈為小戟為大故戈之字從戈則言其為取小也戟之字從乾言其為兵

之健也內謂胡以內接秘者也胡謂矛之旁出者也  
援謂直刃也戈廣二寸者總其內援與胡而言之皆  
徑二寸也內倍之則其長四寸胡三之則其長六寸  
援四之則其長八寸已倨則不入已句則不決此指  
其胡而言之也戈之句主于胡故胡之曲直鋒本必  
橫而取圜于磬折已倨謂胡過于直也已句謂胡過  
于曲也過於直則可以刺而已以之鉤人則不入也  
過于曲則可以鉤人而已以之啄人則不決也故曰  
已倨則不入已句則不決長內者謂胡以內過長也  
短內謂胡以內過短也胡以內過長則援短援短則  
曲于磬折引之則與胡並鉤故折前胡以內過短則  
援長援長則倨于磬折引之則不能速及故不疾倨  
之外胡之裏也句之外胡之表也胡之表裏皆博則  
廣其本以使用也蓋戈之制其廣二寸而胡之表裏  
則宜豐于二寸以其所用以鉤者主于胡故也重三  
錡先儒謂錡為鉞與呂刑所謂其罰百鉞二百鉞之

鍔同也。鍔重六兩大半兩三鍔則凡一斤四兩也。戟亦戈類。然戟有三鋒。則其廣宜少。殺于戈。然後便于用。故戈廣二寸而戟廣寸有半寸。戟之長亦尺有二寸。胡之長亦六寸。特其胡內之接秘有獨長于戈之內半寸而已。故內三之則凡長四寸有半寸矣。援五之則其長七寸有半寸。與內之長亦共尺有二寸而已。倨句中矩亦指其胡而言之也。矩方而其形磬折。則戟兩旁之胡其曲直鋒本有半寸。其金增於戈焉。

桃氏為劔。臘廣二寸有半寸。兩從半之。以其臘廣為之。莖圍長倍之中。其莖設其後。參分其臘廣去一以為首。廣而圍之。

劔之字從刃從僉。鍛者斂其刃焉。服者又從斂而不。用與武欲止戈弓象弛弓之形同意。惟先王之為劔。

欲其斂而不用故為劍之工名官謂之桃氏以桃能辟除不祥而劍亦以止暴惡故也臘劍刃也劍刃謂之臘者與月在丑謂之臘同亦欲斂而不用之意也蓋凡物以陰腐月在丑則陽固而不散故物在臘則不腐先王之為劍所以禦暴惡而劍之所以利用者在乎刃則劍刃謂之臘者豈非有斂而不用之意歟臘廣二寸有半寸謂兩刃各徑二寸半也兩從半之謂劍脊中高兩殺而起鏹也以其獵廣為之莖圍長倍之者劍夾中人所握者謂之莖其圍二寸有半其長則五寸也中其莖設其後謂從中以卻稍大之於操執則易制也三分其臘廣去一以為首廣而圍之於二寸有半寸去其一分則首圍凡一寸三分寸之也

身長五其莖長重九錡謂之上制上士服之身長四其

莖長重七銔謂之中制中士服之身長三其莖長重五銔謂之下制下士服之

樂記曰武王克商禘冕措笏而虎賁之士說劍則所謂上士中士下士皆勇力之士而能用五兵者也夫士事人也事事也能用五兵則亦事事以事人而已故與志於道者同謂之士雖可謂之士然非士之善者也故老子曰善為士者不武夫士有長短則力有強弱則凡服劍者亦各隨其人之材力故劍長而重者則上士服之劍短而輕者則下士服之至中於此而為中制則中士服之夫劍莖五寸身長五其莖長則凡三尺矣壹銔六兩大半兩重九銔則凡三斤十二兩矣此謂之上制惟士之長而能任重可服焉故上士服之身長四其莖長則凡二尺五寸也重七銔則凡二斤十四兩三分兩之二矣此謂之中制故中

士服之身長三其莖長則凡二尺也重五鈞則凡一斤一兩三分兩之一矣此謂之下制惟士之短而能任輕者可服焉故下士服之易曰制而用之謂之法則制者法之用也先王因其人之長短強弱而所佩之劍各有度數存焉則法之用有不同矣此所以有上制中制下制之異也非特乎此也至于為弓亦然故弓人弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下士服之由此觀之則古之為弓為劍者皆各稱其人之材力而已此勇力之所以能精其技而以守則固以戰則克矣

周禮詳解卷三十六